# 文讀 第一集(修正版)

### 周 文 錄

子子節安	論廉恥	論禮義	論忠信	論孝悌	論學習	歸晉	之推	劌論	碏諫	克
錄 而不忘危·	論	論	論		論語	知尝	不言祿	m戦 莊小	龍州吁	段于鄢
						成公三年	僖公二·	公十年	隱公三年	隱公元
						左傳:	四	左傳	年 <i>左</i> 傳	年 <i>左</i> 傳
							左傳…		2	2
··· ニニモ	·· :	:: <u>-</u> 0	…十九	···十七	· · ·	····・七	·····六	··· 四		· · · · · · ·

誠子書 諸葛亮····································
前出師表 諸葛亮也七四
兄子嚴敦書 馬援七
管晏列傳 史記四四
孔子世家贊 史記四三
項羽本紀贊 史記四二
五帝本紀贊 史記四二
學記 禮記三六
運大同篇 禮記三
漢文
馮諼客孟嘗君 戰國策三二

### 六朝文

岳陽樓記 范仲淹  嚴先生祠堂記 范仲淹:	<b>唐文</b> <b>唐文</b> <b>唐文</b> <b>唐文</b> <b>東太宗十思疏 魏徵</b> <b>藤太宗十思疏 魏徵</b>	歸去來兮辭 陶淵明·陳情表 李密
九一	·····································	

訓	尊	賣	明	黄	上	Ξ		前	留	瀧	朋	訓	オ	義
蒙	經	柑	文	州	樞	槐	赤	赤	侯	岡	黨	儉	德	田
大	閣	者	- •	快	密	堂	壁	壁	論	阡	論	示	論	記
意	記	言		哉		銘	賦	賦		表		康		
		4-1		亭	太				蘇		歐	_	資	錢
	王			記	尉	蘇	穌	蘇	軾	歐	陽	司	治	公
	守	基		44	書	軾	軾	軾		陽	修.	馬	通	輔
仁	仁	:		蘇		:	:	:	:	修	:	光·	鑑	:
:	:	:		轍	蘇松	:	:	:	:	:	:	:	:	:
					轍									
:						•								
:					:									
:	:	:		:	:	:	:	:	:	:	:	:	:	:
:	:	:		÷	:	:	:	:	:	:	:	:	:	:
:		•			:	:	i				:			:
:	:	:		:	:	:	:	:	:	:	:	:	:	:
:	:	:		:	:	:	:	:	:	:	:	:	:	:
:		:			:	:	:				:			:
•														
:	:	:		:	:	:	:	:	:	:	:	:	:	:
:	:	:		:	:	:	:	:	:	:	:	:	:	:
:	:	:		:	:	:	:	:	:	:	:	:	:	:
:	:	:		:	:	:	:	:	:	:	:	:	:	:
:					•	•								
:														
·	· —	· —		· -	· —	·	· —	<u>.</u>	· —	· —	:			:
_	_	_		_	_	_	_	0	$\bigcirc$	$\bigcirc$	九	九	九	九
三	九	八		六	四	二	0	八	六	$\stackrel{\sim}{=}$	九	六六	五	<u></u>

### 清文

德育故事緒餘····································	才 曾國	病悔館記 龔自珍勤訓 李文炤	學一自	友人論學書	忠毅
一三九		一三五	… 一 三 三		· — - =

### 鄭伯克段于鄢 隱公元年 左 傳

故名曰寤生,遂惡之。愛共叔段,欲立之。亟請於武公,公弗許 初,鄭武公娶于申,曰武姜,生莊公及共叔段。莊公寤生,驚姜氏,

及莊公即位,為之請制。公曰:「制,嚴邑也。號叔死焉,佗邑唯命。」

請京,使居之,謂之京城大叔。

中,五之一;小,九之一。今京不度,非制也,君將不堪。」公曰:「姜氏 欲之,焉辟害?」對曰:「姜氏何厭之有?不如早為之所,無使滋蔓!蔓, .圖也。蔓草猶不可除,況君之寵弟乎?」公曰:「多行不義,必自斃,子 祭仲曰:「都城過百雉,國之害也。先王之制:大都,不過參國之一;

姑待之。」

難

既 而大叔命西鄙、北鄙貳於己。公子呂曰:「國不堪貳,君將若之何?

欲與大叔,臣請事之;若弗與,則請除之,無生民心。」公曰:「無庸,將

自 及 。 \_\_\_ 大叔又收貳以為己邑,至于廩延。子封曰:「可矣!厚將得眾。」公曰:

「不義,不暱

,厚將崩。」

矣。」命子封帥車二百乘以伐京,京叛大叔段。段入于鄢,公伐諸鄢。五 大 叔完聚,繕甲兵,具卒乘,將襲鄭,夫人將啟之。公聞其期曰:「可

月辛丑,大叔出奔共。

伯 譏失教也。謂之鄭志,不言出奔,難之也。 ·曰:「鄭伯克段于鄢。」段不弟,故不言弟。如二君,故曰克。稱鄭

遂寘姜氏于城潁,而誓之曰:「不及黃泉,無相見也!」既而悔之。

潁考叔為潁谷封人,聞之。有獻於公,公賜之食。食舍肉,公問之。

對曰:「君何患焉。若闕地及泉,隧而相見,其誰曰不然?」公從之。 對曰:「小人有母,皆嘗小人之食矣。未嘗君之羹,請以遺之。」公曰:「爾 有母遺,緊我獨無!」潁考叔曰:「敢問何謂也?」公語之故,且告之悔。

也 泄泄。」遂為母子如初 公入而賦:「大隧之中,其樂也融融。」姜出而賦:「大隧之外,其樂

永錫爾類 君子曰:「潁考叔,純孝也,愛其母,施及莊公。詩曰:『孝子不匱, ° ° 其是之謂乎!」

石碏諫寵州吁 隱公三年 左 傳

又娶于陳,曰厲媯,生孝伯,早死。其娣戴媯,生桓公,莊姜以為己子。 衛莊公娶于齊東宮得臣之妹,曰莊姜,美而無子,衛人所為賦碩人也。

 $\equiv$ 

公子州吁,嬖人之子也。有寵而好兵,公弗禁,莊姜惡之。

將禍是務去,而速之,無乃不可乎?」弗聽 父慈,子孝,兄愛,弟敬,所謂六順也。去順效逆,所以速禍也。君人者, 少陵長, 自 禍。夫寵而不驕,驕而能降,降而不憾,憾而能眇者,鮮矣。且夫賤妨貴, 邪也。四者之來,寵祿過也。將立州吁,乃定之矣;若猶未也,階之為 石 碏諫曰;「臣聞愛子,教之以義方,弗納於邪。 遠間親 ,新間舊,小加大,淫破義,所謂六逆也;君義 驕、奢、淫 ,臣行, ` 佚 ,所

其子厚與州吁遊,禁之,不可。桓公立,乃老

# 曹劌論戰 莊公十年 左 傳

焉?」劌曰:「肉食者鄙,未能遠謀。」 春,齊師伐我。公將戰,曹劌請見。其鄉人曰:「肉食者謀之,又何間 乃入見。

信未孚 未 徧 ,民弗從也。」公曰:「犧牲、玉帛,弗敢加也,必以信。」 問 ·,神弗福也。」公曰:「小大之獄,雖不能察,必以情。」 何 以戰?公曰:「衣食所安,弗敢專也,必以分人。」對曰:「小惠 對曰:「小 對曰:「忠

公與之乘 ,戰於長勺。公將鼓之。劌曰:「未可。」 齊人三鼓 ,劌曰:

可矣。」齊師敗績。

之屬也,可

以

一戰。

戰,則請從

公將 馳 之, 劌 曰:「未可。」下視其轍,登軾而望之。 曰:「可矣。」

遂逐齊師。

彼 竭 我 既克,公問其故。對曰:「夫戰,勇氣也。一 盈 ,故克之。夫大國,難測也,懼有伏焉。吾視其轍亂,望其旗靡 鼓作氣,再而衰,三而 竭

故逐之。」

# 介之推不言禄 僖公二十四年 左 傳

晉侯賞從亡者,介之推不言祿,祿亦弗及。

乎?竊人之財,猶謂之盜;況貪天之功,以為己力乎?下義其罪,上賞其 奸;上下相蒙,難與處矣。」 必 將有主 推曰:「獻公之子九人,唯君在矣。惠、懷無親,外內棄之。天未絕晉, 。主晉祀者,非君而誰?天實置之,而二三子以為己力,不亦誣

且 文也。身將隱,焉用文之?是求顯也。」其母曰:「能如是乎?與汝偕隱。」 出怨言,不食其食。」其母曰:「亦使知之,若何?」對曰:「言,身之 其母曰:「盍亦求之?以死,誰懟?」對曰:「尤而效之,罪又甚焉!

遂隱而死。

晉侯求之不獲,以縣上為之田,曰:「以志吾過,且旌善人。」

## 楚歸晉知罃 成公三年 左

傳

晉人歸楚公子穀臣與連尹襄老之尸于楚,以求知罃。於是荀首佐中軍

矣,故楚人許之。

以為俘馘。執事不以釁鼓,使歸即戮,君之惠也。臣實不才,又誰敢怨?」 王 送 知罃曰:「子其怨我乎?」對曰:「二國治戎,臣不才,不勝其任

忿,以相宥也。兩釋纍囚,以成其好。二國有好,臣不與及,其誰敢德?」 王 曰:「然則德我乎?」對曰:「二國圖其社稷,而求紓其民,各懲其

王 曰:「子歸,何以報我?」對曰:「臣不任受怨,君亦不任受德。 無

怨無德,不知所報?」

君之以為戮,死且不朽。若從君之惠而免之,以賜君之外臣首。首其請於 王 曰:「雖然,必告不穀。」對曰:「以君之靈,纍臣得歸骨於晉。寡

七

寡 君,而 以戮於宗,亦死且不朽。若不獲命,而 使嗣宗職,次及 於事 ; 而

帥 偏 師 , 以 以修封疆 。雖遇執事,其弗敢違,其竭力致死,無有二心,以 盡

臣禮,所以報也!」

王曰:「晉未可與爭。」重為之禮而歸之。

### 論學習 論語

子曰:「學而時習之,不亦說乎?有朋自遠方來,不亦樂乎?人不知而

不慍,不亦君子乎?」(學而第一)

子曰:「弟子入則孝,出則弟,謹 而信,汎愛眾,而親仁。行有餘力

則以學文。」 (學而第一)

有信。雖曰未學,吾必謂之學矣。」(學而第一) 子夏曰:「賢賢易色;事父母能竭 其力;事君能致其身;與朋友交言而

子曰:「君子不重則不威,學則不固。主忠信。無友不如己者。過則勿

**憚改。」(學而第一)** 

可謂好學也已。」(學而第一) 子曰:「君子食無求飽,居無求安,敏於事而慎於言,就有道而正焉

六十而耳順,七十而從心所欲,不踰矩。」 (為政第二) 子曰:「吾十有五而志於學,三十而立,四十而不惑,五十而知天命,

子曰:「學而不思則罔,思而不學則殆。」 (為政第二)

子張學干祿 子曰:「由,誨女知之乎?知之為知之,不知為不知,是知也。」 。子曰:「多聞闕疑,慎言其餘 ,則寡尤。多見閼殆,慎行

其餘,則寡悔。言寡尤,行寡悔,禄在其中矣。」(為政第二)

九

子貢問曰:「孔文子何以謂之『文』也?」子曰:「敏而好學,不恥下

問,是以謂之『文』也。」(公冶長第五)

與朋友共,蔽之而無憾。」顏淵曰:「願無伐善,無施勞。」子路曰:「願 顏淵、季路侍。子曰:「盍各言爾志?」子路曰:「願車馬、衣輕裘,

聞子之志。」子曰:「老者安之,朋友信之,少者懷之。」 (公冶長第五)

長第五) 子曰:「十室之邑,必有忠信如丘者焉,不如丘之好學也。」 (公冶

貳過。不幸短命死矣,今也則亡,未聞好學者也。」 (雍也第六) 哀公問:「弟子孰為好學?」孔子對曰:「有顏回者好學,不遷怒,不

冉求曰:「非不說子之道,力不足也。」子曰:「力不足者,中道而廢。

今女畫。」 (雍也第六)

子曰:「知之者不如好之者,好之者不如樂之者。」 (雍也第六)

仁者先難而後獲,可謂仁矣。」(雍也第六) 子曰:「君子博學於文,約之以禮,亦可以弗畔矣夫!」(雍也第六) 樊遲問 `知·子曰·「務民之義,敬鬼神而遠之,可謂知矣。」問仁·曰:

子曰:「默而識之,學而不厭,誨人不倦,何有於我哉?」 子曰:「述而不作,信而好古,竊比於我老彭。」 (述而第七) (述而第

セ

子曰:「德之不修,學之不講,聞義不能徒,不善不能改,是吾憂也。」

述而第七) 子曰:「加我數年,五、十以學《易》,可以無大過矣。」 (述而第七)

子曰:「若聖與仁,則吾豈敢?抑為之不厭,誨人不倦,則可謂云爾已

矣。」公西華曰:「正唯弟子不能學也。」 (述而第七)

子曰:「三年學,不至於穀,不易得也。」 (泰伯第八)

子曰:「篤信好學,守死善道。危邦不入,亂邦不居,天下有道則見,

無道則隱。邦有道,貧且賤焉,恥也;邦無道,富且貴焉,恥也。」(泰 伯第八)

子曰:「學如不及,猶恐失之。」 (泰伯第八)

達巷黨人曰:「大哉孔子,博學而 無所成名。」子聞之,謂門弟子曰:

「吾何執?執御乎,執射乎?吾執御矣。」 (子罕第九)

子曰:「譬如為山,未成一簣,止,吾止也!譬如平地,雖覆一簣,進

吾往也!」(子罕第九)

與權。」「唐棣之華,偏其反而。豈不爾思?室是遠而。」子曰:「未之思 子曰:「可與共學,未可與適道;可與適道,未可與立;可與立,未可

也,未何遠之有?」 (子罕第九)

子路使子羔為費宰。子曰:「賊夫人之子!」子路曰:「有民人焉,有

社稷焉,何必讀書,然後為學?」子曰:「是故惡夫佞者。」 (先進第十

- \

樊遲請學稼。子曰:「吾不如老農。」請學為圃。曰:「吾不如老圃。」

莫敢不服;上好信,則民莫敢不用情。夫如是,則四方之民,襁負其子而 樊 遲出。子曰:「小人哉,樊須也!上好禮,則民莫敢不敬;上好 義 ,則民

至矣;焉用稼!」(子路第十三)

子曰:「古之學者為己,今之學者為人。」 ( 憲問第十四 )

=

子曰:「莫我知也夫!」子貢曰:「何為其莫知子也?」子曰:「不怨天,

不尤人;下學而上達。知我者,其天乎!」(憲問第十四)

衛靈公問陳於孔子。孔子對曰:「俎豆之事,則當聞之矣;軍旅之事,

未之學也。」明日遂行。 (衛靈公第十五)

子曰:「賜也,女以予為多學而識之者與?」對曰:「然,非與?」曰:

「非也!予一以貫之。」(衛靈公第十五)

子曰:「不曰『如之何,如之何』者,吾末如之何也已矣!」 (衛靈

公第十五) 子曰:「吾嘗終日不食,終夜不寢,以思;無益,不如學也。」(衛靈

公第十五) 子曰:「君子謀道不謀食。耕也,餒在其中矣;學也,禄在其中矣。君

兀

子憂道不憂貧。」(衛靈公第十五)

也;困而不學,民斯為下矣!」 (季氏第十六) 孔子曰:「生而知之者,上也;學而知之者,次也;因而學之,又其次

聞禮,又聞君子遠其子也。」 無以立!』鯉退而學禮。聞斯二者。」陳亢退而喜曰:「問一得三:聞詩, 過庭。曰:『學詩乎?』對曰:『未也。』『不學詩,無以言!』鯉退而學詩。 他日,又獨立,鯉趨而過庭。曰:『學禮乎?』對曰:『未也。』『不學禮 陳亢問於伯魚曰:「子亦有異聞乎?」對曰:「未也。嘗獨立,鯉趨而

子曰:「二三子!偃之言是也。前言戲之耳!」(陽貨第十七) 曰:「昔者,偃也聞諸夫子曰:『君子學道則愛人;小人學道則易使也。』」 子之武城,聞弦歌之聲,夫子莞爾而笑曰:「割雞焉用牛刀?」子游對

子曰:「由也,女聞六言六蔽矣乎?」對曰:「未也。」「居!吾語女:

六

好 好直不好學,其蔽也絞;好勇不好學,其蔽也亂;好剛不好學,其蔽也狂。」 仁不好學,其蔽也愚;好知不好學,其蔽也蕩;好信不好學,其蔽也賊;

(陽貨第十七)

邇之事父,遠之事君;多識於鳥、獸、草、木之名。」 子曰:「小子!何莫學夫詩?詩:可以興,可以觀,可以群,可以怨; (陽貨第十七)

子夏曰:「日知其所亡,月無忘其所能,可謂好學也已矣!」 (子張

第十九)

子夏曰:「博學而篤志,切問而近思;仁在其中矣。」 (子張第十九)

子夏曰:「百工居肆以成其事;君子學以致其道。」 (子張第十九)

子夏曰:「仕而優則學,學而優則仕。」 (子張第十九)

衛公孫朝問於子貢曰:「仲尼焉學?」子貢曰:「文武之道,未墜於地,

而亦何常師之有?」 人。賢者識其大者,不賢者識其小者,莫不有文武之道焉。夫子焉不學, (子張第十九)

子曰:「不知命,無以為君子也;不知禮,無以立也;不知言,無以知

### 論孝悌 論語

人也。」

(堯曰第二十)

未之有也。君子務本,本立而道生。孝弟也者,其為仁之本與!」 有子曰:「其為人也孝弟,而好犯上者鮮矣。不好犯上,而好作亂者, (學而

第一)

我 對曰:『無違。』」樊遲曰:「何謂也?」子曰:「生,事之以禮;死,葬 孟 |懿子問孝。子曰:「無違。」樊遲御,子告之曰:「孟孫問孝於我,

七

之以禮,祭之以禮。」(為政第二)

子夏問孝。子曰:「色難。有事,弟子服其勞;有酒食,先生饌。曾是

以為孝乎?」 (為政第二)

弟 。』施於有政,是亦為政,奚其為為政?」 (為政第二) 或謂孔子曰:「子奚不為政?」子曰:「《書》云孝乎!『惟孝,友於兄

子曰:「父在觀其志,父沒觀其行。三年無改於父之道,可謂孝矣。」

(學而第一)

孟武伯問孝。子曰:「父母唯其疾之憂。」 (為政第二)

子游問孝。子曰:「今之孝者,是謂能養。至於犬馬,皆能有養;不敬,

何以別乎?」 (為政第二)

曾子曰:「吾聞諸夫子:『孟莊子之孝也,其他可能也,其不改父之臣

與父之政,是難能也。』」 (子張第十九)

### 論忠信 論語

子以 四教:文、行、忠、信。 (述而第七)

曾子曰:「吾日三省吾身:為人謀而不忠乎?與朋友交而不信乎?傳不

習乎?」 (學而第一)

子夏曰:「賢賢易色,事父母能竭其力,事君能致其身,與朋友交,言

而 有信。雖曰未學,吾必謂之學矣。」 (學而第一)

憚改。」 子曰:「君子不重則不威,學則不固。主忠信,無友不如己者,過則勿 (學而第一)

子張問行。子曰:「言忠信,行篤敬,雖蠻貊之邦行矣。言不忠信,行

不篤敬,雖州里行乎哉?立,則見其參於前也;在輿,則見其倚於衡也。 九

夫然後行。」子張書諸紳。 (衛靈公第十五)

### 論禮義 論語

知和 而和,不以禮節之,亦不可行也。」 有子曰:「禮之用,和為貴。先王之道,斯為美,小大由之。有所不行, (學而第一)

子曰:「人而不仁,如禮何!人而不仁,如樂何!」 (八佾第三)

林放問禮之本。子曰:「大哉問!禮,與其奢也,寧儉;喪,與其易也,

寧戚。」(八佾第三)

子曰:「恭而無禮則勞,慎而無禮則葸,勇而無禮則亂,直而無禮則絞

君子篤於親,則民興於仁;故舊不遺,則民不偷。」 (泰伯第八)

子曰:「君子喻於義,小人喻於利。」 (里仁第四)

子曰:「君子義以為質,禮以行之,孫以出之,信以成之。君子哉!」

(衛靈公第十五)

過 庭。曰:『學《詩》乎?』對曰:『未也。』『不學《詩》,無以言。』 陳亢問於伯魚曰:「子亦有異聞乎?」對曰:「未也。嘗獨立,鯉趨而

退而學《詩》。他日,又獨立,鯉趨而過庭。曰:『學禮乎?』對曰:『未也。』

三:聞《詩》,聞禮,又聞君子之遠其子也。」 (季氏第十六) 『不學禮,無以立。 鯉退而學禮。聞斯二者。」陳亢退而喜曰:「問一得

第十七) 子曰:「禮云禮云,玉帛云乎哉?樂云樂云,鐘鼓云乎哉?」 (陽貨

.

### 論廉恥 論語

子曰:「奢則不孫,儉則固。與其不孫也,寧固。」

(述而第七)

子曰:「以約失之者,鮮矣。」 (里仁第四)

人之所惡也;不以其道得之,不去也。君子去仁,惡乎成名?君子無終食 子曰:「富與貴,是人之所欲也;不以其道得之,不處也。貧與賤 ,是

之間違仁,造次必於是,顛沛必於是。」 (里仁第四)

子曰:「飯疏食,飲水,曲肱而枕之,樂亦在其中矣。不義而富且貴,

於我如浮雲。」(述而第七)

鼓 而攻之可也!」(先進第十一) 季氏富於周公,而求也為之聚斂而附益之。子曰:「非吾徒也,小子鳴

子曰:「古者言之不出,恥躬之不逮也。」 (里仁第四)

子曰:「其言之不怍,則為之也難!」 (憲問第十 四

子曰:「見賢思齊焉,見不賢而內自省也。」 (里仁第四)

子曰:「君子病無能焉,不病人之不己知也。」 (衛靈公第十五)

子曰:「躬自厚,而薄責於人,則遠怨矣!」 (衛靈公第十五)

子曰:「篤信好學,守死善道。危邦不入,亂邦不居。天下有道則見,

無道則隱。邦有道,貧且賤焉,恥也;邦無道,富且貴焉,恥也。」(泰

伯第八)

憲問「恥」。子曰:「邦有道,穀。邦無道,穀,恥也。」 (憲問第十

P

### 君子安而不忘危

論語

子曰:「人無遠慮,必有近憂。」 (衛靈公第十五)

=

### 易傳

子曰:「危者,安其位者也。亡者,保其存者也。亂者,有其治者也。

是故君子安而不忘危,存而不忘亡,治而不忘亂,是以身安而國家可保也。」

《易》曰:「其亡其亡,系于苞桑。」 (系辭下傳 第五章)

《易》之興也,其於中古乎?作《易》者,其有憂患乎?」 (系辭下

傳 第七章)

故其辭危。危者使平,易者使傾,其道甚大,百物不廢,懼以終始,其要 無咎,此之謂《易》之道也。 《易》之興也,其當殷之末世,周之盛德邪?當文王與紂之事邪?是 (系辭下傳 第十一章)

### 左傳

晉侯以樂之半賜魏絳,曰:「子教寡人和諸戎狄以正諸華,八年

後 從 三子之勞也,臣何力之有焉?抑臣願君安其樂而思其終也。《詩》曰: 和 之 樂 中, 可 0 戎 八只君 狄,國之福 以 夫 九合諸侯 殿 樂 子 邦 以 , 殿天子之 國 安德,義 、同 也。八年之中,九合諸侯 , 如 福 禄、來遠人,所 樂之和 邦。 以 處之, 樂只君子 , 無所 禮以 不諧 謂樂也。《書》曰:『居安思危。』 行之,信以守之,仁 ,福 ,請與子樂之。」 祿 , 諸 攸 侯 同 0 無隱,君之靈也,二 便蕃左右,亦是帥 以 辭曰:「夫 厲之, 而

### 孟子

思

則有備,有備無患。敢以此規。」(襄公十有一年)

人不得 非也。樂民之樂者,民亦樂其樂;憂民之憂者,民亦憂其憂。樂以天下, 齊宣王見孟子於雪宮。王曰:「賢者亦有此樂乎?」孟子對曰:「有。 則 非其上矣。不得 而非上者,非也;為民上而不與民同樂者,亦

管夷吾舉 心忍性,曾益其所不能 必先苦其心志,勞其筋骨, 孟子曰:「舜發於畎畝之中,傅說舉於版築之間,膠鬲舉於魚鹽之中 於 八士,孫 叔敖舉於海 餓其體膚,空乏其身,行拂亂其所為;所以動 , 百里奚舉於市 0 故 天 將降大任於是人 也

而 後喻。入則無法家拂士,出則無敵國外患者,國恆亡。然後知生於憂患 死於安樂也。」 人 恆 過,然後能改;困 (告子下) 於心,衡於慮,而後作;徵於色,發於聲,而

### 說苑

孫 孫 叔 叔 敖正衣冠而出見之 敖為楚令尹,一國吏民皆來賀。有一老父衣麤衣,冠白冠 ,謂老父日 :「楚王不知臣不肖 ,使臣受吏民 ,後來

弔

孫 大而心益小,祿已厚而慎不敢取。君謹守此三者,足以治楚矣。」 人者,民去之;位已高而擅權者,君惡之;祿已厚而不知足者,患處之 之垢,人盡來賀,子獨後來弔,豈有說乎?」父曰:「有說。身已貴而驕 叔敖 从再拜日 ·「敬受命,願聞餘教 。」父曰 ·「位已高而意益下,官益 (敬慎)

### <u>-</u>

孟子節錄

### 仁者無敵

深耕易耨;壯者以暇日修其孝悌忠信,入以事其父兄,出以事其長上;可 使 制挺 孟子對曰:「地方百里,而可以王。王如施仁政於民,省刑罰,薄稅斂, 以撻秦楚之堅甲利兵矣 0

彼奪其民時,使不得耕耨,以養其父母;父母凍餓,兄弟妻子離散。

陷溺其民,王往而征之,夫誰與王敵?故曰:『仁者無敵。』王請勿疑

彼

二七

(梁惠王上)

### 君子三樂

孟子曰:「君子有三樂,而王天下不與存焉。父母俱存,兄弟無故,一

樂也;仰不愧於天,俯不怍於人,二樂也;得天下英才而教育之,三樂也。

君子有三樂,而王天下不與存焉。」(盡心上)

### 專心致志

者也。使弈秋誨二人弈,其一人專心致志,惟弈秋之為聽;一人雖聽之, 今夫弈之為數,小數也;不專心致志,則不得也。弈秋,通國之善弈

一心以為有鴻鵠將至,思援弓繳而射之,雖與之俱學,弗若之矣 為是其智弗若與?曰:非然也。 (告子上)

### 魚與熊掌

魚 ,我所欲也;熊掌,亦我所欲也。二者不可得兼,舍魚而取熊掌者

也 生亦我 。生,亦我所欲也;義,亦我所欲也。二者不可得兼,舍生而取義者也。 所欲,所欲有甚於生者,故不為苔得也。死亦我所惡,所惡有甚於

死者,故患有所不辟也。

可以 賢者有是心也,人皆有之,賢者能勿喪耳。 甚 於死者,則凡可以辟患者,何不為也?由是則生,而有不用也;由是則 辟患,而 如 使人之所欲莫甚於生,則凡可以得生者,何不用也?使人之所惡莫 有不為也。是故,所欲有甚於生者,所惡有甚於死者;非獨 (告子上)

### 揠苗助長

助 苗長矣。」 宋人有閔其苗之不長而揠之者。芒芒然歸,謂其人曰:「今日病矣,予 其子趨而往視之,苗則槁矣

天下之不助苗長者寡矣。以為無益而舍之者,不耘苗者也;助之長者

揠苗者也,非徒無益,而又害之。 (公孫丑上)

## 齊人驕其妻妾

其與飲食者,盡富貴也;而未嘗有顯者來。吾將瞷良人之所之也。」 與飲食者,則盡富貴也。其妻告其妾曰:「良人出,則必餍酒肉而 齊人有一妻一妾而處室者,其良人出,則必饜酒肉而後反。其妻問所 後反。問

乞其餘;不足,又顧而之他。此其為餍足之道也! 蚤起 ,施從良人之所之。遍國中無與立談者。卒之東郭墦間之祭者,

其良人,而 其妻歸,告其妾曰:「良人者,所仰望而終身也。今若此!」 相泣於中庭。而良人未之知也,施施從外來,驕其妻妾 與其妾訕

由君子觀之,則人之所以求富貴利達者,其妻妾不羞也而不相泣者,

幾希矣! (離婁下)

### 指不若人

孟子曰:「今有無名之指,屈而不信,非疾痛害事也。如有能信之者,

不知惡。此之謂不知類也。」(告子上) 則 不遠秦楚之路,謂指之不若人也。指不若人,則知惡之;心不若人,則

## 王顧左右而言他

孟子謂齊宣王曰:「王之臣有託其妻子於其友,而之楚遊者。比其反也,

則凍餒其妻子,則如之何?」

王曰:「棄之。」

曰:「士師不能治士,則如之何?」

王曰:「已之。」

曰:「四境之內不治,則如之何?」

#### 秦文

# 馮諼客孟嘗君 戰國策

孟嘗君笑而受之,曰:「諾。」左右以君賤之也,食以草具 曰:「客何好?」曰:「客無好也。」曰:「客何能?」曰:「客無能也。」 齊人有馮諼者,貧乏不能自存,使人屬孟嘗君,願寄食門下。孟嘗君

乎!出無車。」左右皆笑之,以告。孟嘗君曰:「為之駕,比門下之車客。」 孟嘗君曰:「食之,比門下之客。」居有頃,復彈其鋏,歌曰:「長鋏歸來 於是乘其車,揭其劍,過其友。曰:「孟嘗君客我。」後有頃,復彈其劍鋏 居有頃,倚柱,彈其劍,歌曰:「長鋏歸來乎!食無魚。」左右以告。

歌曰:「長鋏歸來乎!無以為家。」左右皆惡之,以為貪而不知足。孟嘗君

問:「馮公有親乎?」對曰:「有老母。」孟嘗君使人給其食用,無使乏, 於是馮諼不復歌。

羞,乃有意欲為收責於薛乎?」馮諼曰:「願之。」於是約車治裝,載券契 者也。」孟嘗君笑曰:「客果有能也。吾負之,未嘗見也。」請而見之。謝 而行。辭曰:「責畢收,以何市而反?」孟嘗君曰:「視吾家所寡有者。」 諼署曰:「能。」孟嘗君怪之,曰:「此誰也?」左右曰:「乃歌夫長鋏歸來 曰:「文倦於事,憒於憂,而性懧愚,沉於國家之事,開罪於先生。先 後孟嘗君出記,問門下諸客:「誰習計會,能為文收責於薛者乎?」馮 生不

諸 民,因燒其券。民稱萬歲! 驅 而之薛。使吏召諸民,當償者悉來合券。券徧合,起,矯命以責賜

長驅到齊,晨而求見。孟嘗君怪其疾也,衣冠而見之,曰:「責畢收乎?

者以義耳!竊以為君市義。」孟嘗君曰:「市義奈何?」曰:「今君有區區 寡有者』,臣竊計:君宮中積珍寶,狗馬實外廄,美人充下陳,君家所寡有 民稱萬歲!乃臣所以為君市義也。」孟嘗君不說,曰:「諾,先生休矣。」 之薛,不拊愛子其民,因而賈利之。臣竊矯君命,以責賜諸民。因燒其券

來何疾也?」曰:「收畢矣。」「以何市而反?」馮諼曰:「君云『視吾家所

市義者,乃今日見之。」 於薛。未至百里 後朞年,齊王謂孟嘗君曰:「寡人不敢以先王之臣為臣。」孟嘗君 ,民扶老攜幼,迎君道中。孟嘗君顧謂馮諼: 「先生所為文 就國

請為君復鑿二窟。」孟嘗君予車五十乘,金五百斤,西遊於梁,謂梁王曰: 馮 ·護曰:「狡兔有三窟,僅得免其死耳。今君有一窟,未得高枕而臥也!

齊放其大臣孟嘗君於諸侯,諸侯先迎之者,富而兵強。」於是梁王虛上

三四

驅 位 ,誠孟嘗君曰:「千金,重幣也;百乘,顯使也。齊其聞之矣!」梁使三 ,以故相為上將軍;遣使者,黃金千斤,車百乘,往聘孟嘗君。馮諼先

反,孟嘗君固辭不往也。

君姑高枕為樂矣。」 謝孟嘗君,曰:「寡人不祥,被於宗廟之祟,沉於諂諛之臣,開罪於君。寡 人不足為也,願君顧先王之宗廟,姑反國,統萬人乎!」馮諼誡孟嘗君 願請先王之祭器,立宗廟於薛。」廟成,還報孟嘗君。曰:「三窟已就 齊王聞之,君臣恐懼。遣太傅齎黃金千斤、文車二駟、服劍一,封書

孟嘗君為相數十年,無纖介之禍者,馮諼之計也。

#### 漢文

# 禮運大同篇 禮記

者皆有所養,男有分,女有歸。貨惡其棄於地也,不必藏於己;力惡其不 出 獨子其子,使老有所終,壯有所用,幼有所長,矜、寡 於身也,不必為己。是故謀閉而不興,盜竊亂賊而不作,故外戶而不閉 大道之行也,天下為公,選賢與能 ,講信修睦。故人不獨親其親 、孤 、獨 廢 、疾 , 不

## 學記 禮記

是謂大同

足 以化民。君子如欲化民成俗,其必由學乎! 發慮憲,求善良,足以謏聞,不足以動眾。就賢體遠,足以動眾,未

為先。〈兒命〉曰:「念終始典于學。」其此之謂乎! 玉不琢,不成器;人不學,不知道。是故古之王者,建國君民,教學

學然後知不足,教然後知困。知不足,然後能自反也;知困,然後能自強 也。故曰:教學相長也。〈兌命〉曰:「學學半。」其此之謂乎! 雖 有嘉肴,弗食,不知其旨也;雖有至道,弗學,不知其善也。是故

近者說服,而遠者懷之。此大學之道也。記曰:「蛾子時術之。」其此之謂 謂之小成;九年知類通達,強立而不反,謂之大成。夫然後足以化民易俗 年視離經辨志;三年視敬業樂羣;五年視博習親師;七年視論學取友, 古之教者,家有塾,黨有庠,術有序,國有學。比年入學,中年考校:

孫其業也。夏、楚二物,收其威也。未卜禘不視學,游其志也。時觀而弗 大學始教,皮弁祭菜,示敬道也。〈宵雅〉肄三,官其始也。入學鼓篋,

語,存其心也。幼者聽而弗問,學不躐等也。此七者,教之大倫也。記曰:

「凡學:官,先事;士,先志。」其此之謂乎!

子之於學也, 友 不學博依 而信其道。是 大學之教也,時教必有正業 , 不 藏焉 能安詩; 以 雖 ,脩焉 離師輔而不反也。〈兌命〉曰:「敬孫務時敏 不學雜 ,息焉 服 4 , , 游焉 退息必有居學。不學操縵,不能安弦 不 能 安禮 。夫然 0 不 , 故 興 八其藝 安其學而 , 不能 親其 樂學 師 ,厥 樂 故 脩乃 其 君

來

。 」 其

此

之謂

乎!

師, 其 誠 苦其 , 教 今之教者,呻其占畢,多其訊言,及于數進,而不顧其安,使人 難 人不盡其材 而 不知 其益 ,其施之也悖 也。 雖終其業 ,其求之也佛 ,其去之必速 0 夫然 0 敎 之不刑 ,故隱其學 , 其 此 而 之由 不由 疾 其

大學之法,禁於未發之謂豫,當其可之謂時, 不 陵節 而 施之謂孫 , 相

觀而善之謂摩。此四者,教之所由興也。

則 壞 亂 發然後禁,則扞格而不勝;時過然後學,則勤苦而難成;雜施而不孫 而 不脩 ;獨學而無友 , 則孤 陋而寡聞 ;燕朋逆其師;燕辟廢其學

此六者,教之所由廢也。

則易,開而弗達則思。和、易以思,可謂善喻矣。 之教,喻也, 君子 旣知 道而 教之所由興 弗牽,強 , 又 而 知教之所由廢 弗抑,開 而弗達 ,然後可以為人師也。故君子 。道而弗牽則和,強 而弗抑

易 ,或失則止。此四者,心之莫同也。知其心,然後能救其失也。教也者, 學者有四失,教者必知之。人之學也,或失則多,或失則寡,或失則

長善而救其失者也。

善歌者,使人繼其聲;善教者,使人繼其志。其言也約而達,微而臧

罕譬而喻,可謂繼志矣

擇師不可不慎也。記曰:「三王、四代唯其師。」此之謂乎! 能 為 師然 君子知至學之難易,而知其美惡,然後能博喻;能博喻然後能為師; 後 能 為長;能為長然後能為君 。故師也者,所以學為君也。是故

禮,雖詔於天子,無北面,所以尊師也。 所不臣於其臣者二:當其為尸 凡學之道 ),嚴師 為難。師嚴然後道尊,道尊然後民知敬學。是故君之 ,則弗臣也;當其為師,則弗臣也。大學之

待其從容 怨 不善問者反此。善待問者如撞鐘,叩之以小者則小鳴,叩之以大者則大鳴 之。善問者,如 善學者,師逸而功倍,又從而庸之;不善學者,師勤而功半,又 ,然後盡其聲;不善答問者反此。此皆進學之道也。 攻堅木,先其易者,後其節目,及其久也,相說以 解 ; 從而

記 問之學,不足以為人師。必也其聽語乎!力不能問 ,然後語之。 語

之而不知,雖舍之可也。

前 。君子察於此三者,可以有志於學矣。 良冶 之子 , 必學為裘;良弓之子 ,必學為箕;始駕馬者反之,車在馬

五色弗得不章;學無當於五官,五官弗得不治。師無當於五服,五服弗得 古之學者 ,比物醜類。鼓無當於五聲,五聲弗得不和;水無當於五色,

不親

可 以有志於學矣。三王之祭川也,皆先河而後海,或源也,或委也。此之 君子曰:「大德不官,大道不器,大信不約,大時不齊。」察於此四者,

調務本

Л

# 五帝本紀贊 史記

是 繫姓〉,儒者或不傳。余嘗西至空桐,北過涿鹿,東漸於海,南浮江淮矣, 黄帝,其文不雅馴,薦紳先生難言之。孔子所傳宰予問〈五帝德〉及〈帝 至長老皆各往往稱黃帝、堯、舜之處,風教固殊焉,總之,不離古文者近 太史公曰:學者多稱五帝,尚矣。然《尚書》獨載堯以來,而百家言

紀」書首。 深考,其所表見皆不虚。書缺有間矣,其軼乃時時見於他說。非好學深思, 心知其意,固難為淺見寡聞道也。余幷論次,擇其言尤雅者,故著為「本 予觀《春秋》、《國語》,其發明〈五帝德〉、〈帝繫姓〉,章矣;顧弟弗

# 項羽本紀贊 史記

太史公曰:吾聞之周生曰「舜目蓋重瞳子」,又聞項羽亦重瞳子。羽豈

東城 裂天 其苗 其 也 不可勝數。然羽非有尺寸,乘勢起隴畝之中,三年,遂將五諸侯滅 私 0 智而 及 下,而 裔邪?何興之暴也!夫秦失其政,陳涉首難,豪傑鑫起,相 ,尚不覺寤,而不自責,過矣。乃引「天亡我,非用兵之罪也」,豈不 羽 背關懷楚 不師古 封王侯,政由羽出,號為「霸王」。位雖不終,近古 ,謂霸 ,放逐義帝 王之業, 而 欲 自立 以力征經營天下,五年卒亡其國,身死 ,怨王侯叛己 , 難 矣 0 自 矜 以 功伐 來未當有 與並爭, 秦,分 ,奮

#### 孔 子世家贊 史記

太史公曰:《詩》有之:「高

山仰止,景行

行止。」

雖

不能至

,

然

ジ

鄉

謬哉

往 之。余讀孔氏書,想見其為人。適魯,觀仲尼廟堂,車 服禮器,諸 眾矣!當時 生 以

時習禮其家,余祇回留之,不能去云。天下君王,至於賢人, 則榮,沒則已焉!孔子布衣,傳十餘世,學者宗之。自天子王侯,中國言

### 管晏列傳 史記

子 常欺鮑叔 任政於齊,齊桓公以霸,九合諸侯,一匡天下,管仲之謀也。 糾 。及小白立為桓公,公子糾死,管仲囚焉。鮑叔遂進管仲。管仲既用, 管仲夷吾者,潁上人也。少時常與鮑叔牙游,鮑叔知其賢。管仲貧困 ,鮑 叔終善遇之,不以為言。已而鮑叔事齊公子小白,管仲事公

不 吾嘗三仕三見逐於君,鮑叔不以我為不肖,知我不遭時也。吾嘗三戰三走 我貧也。吾嘗為鮑叔謀事而更窮困,鮑叔不以我為愚,知時有利不利也。 以 叔 不以 我 管仲曰:「吾始困時,嘗與鮑叔賈,分財利多自與,鮑叔不以我為貪 為 無恥 我 怯 , , 知 知我不羞小節而恥功名 我有老母也。公子糾敗 不顯於天下也。生我者父母, , 召忽死之, 吾幽囚受辱 知我 鮑 叔

者鮑子也。」

鮑

知

大夫。天下不多管仲之賢而多鮑叔能知人也。 鮑 叔 既 進管仲 ,以身下之。子孫世祿於齊 , 有封邑者十餘世,常為名

之所欲 好惡。故其稱曰:「倉廩實而知禮節,衣食足而知榮辱,上服度則六親固。 四 維 不張 管仲 , 因 ,國乃滅亡。下令如流水之原,令順民心。」故論卑而易行。俗 既 而予之;俗之所否,因而去之。 任 政相齊,以區區之齊在海濱 ,通貨積財 ,富國彊兵, 與俗同

少 之 而管仲 姬 諸 , 南 其為政也,善因禍而為福,轉敗而為功。貴輕重,慎權衡。桓公實怒 侯 因 襲蔡,管仲因而 由是歸齊 而 令燕修召公之政。於柯之會,桓公欲背曹沫之約,管仲因而信 。故曰:「知與之為取,政之寶也。」 伐楚 ,責包茅不入貢於問室。桓公實北 征 山 戎 ,

管仲富擬於公室,有三歸、反坫,齊人不以為侈。管仲卒,齊國遵其

四五

政,常彊於諸侯。後百餘年而有晏子焉。

及之,即危行。國有道,即順命;無道,即衡命。 於 齊 晏平仲嬰者 既 相 齊 ,食不重 ,萊之夷維人也。事齊靈公、莊公、景公,以節儉力行重 肉 , 妾 不衣帛 ,。其在 朝 , 君 以 語 此三世顯名於諸 及之 , 即危 言。, 侯 語 不

方吾 固 何子求絕之速也?」石父曰:「不然。吾聞君子詘於不知己而信於知 閨。久之,越石父請絕。晏子懼然,攝衣冠謝曰:「嬰雖不仁,免子 不 在 如 越石 在 縲 縲絏 絏 父賢,在縲絏中。晏子出,遭之塗,解左驂贖之, 中 -, 彼不 之中。」晏子於是延入為上客 知 我也。夫子既已感寤 而贖我 ,是知己;知己而 載歸 弗 己者 於阨 無禮 謝 , 0

晏子為齊相 , 出 , 其御之妻從門間 而窺其夫。 其夫為相 御 , 擁 大蓋

策

駒

馬,意氣揚揚甚自得也。

既

而歸,其妻請去。夫問其故。妻曰:「晏子

四六

長不滿六尺,身相齊國,名顯諸侯。今者妾觀其出,志念深矣 下者。今子長八尺,乃為人僕御,然子之意自以為足,妾是以求去也。」 ,常有 以自

其後夫自抑損。晏子怪而問之,御以實對。晏子薦以為大夫。

(晏子春秋),詳哉其言之也。既見其著書,欲觀其行事,故次其傳。至其 太史公曰:吾讀管氏〈牧民〉、〈山高〉、〈乘馬〉、〈輕重〉、〈九府〉,及

書,世多有之,是以不論,論其軼事。

管仲世所謂賢臣,然孔子小之。豈以為周道衰微,桓公既賢,而不勉

之至王 ,乃稱霸哉?語曰:「將順其美,匡救其惡,故上下能相親也。」豈

管仲之謂乎?

方晏子伏莊公屍哭之,成禮然後去,豈所謂「見義不為無勇」者邪?

至其諫說,犯君之顏,此 所謂「進思盡忠,退思補過」者哉!假令晏子而

兀 七

在,余雖為之執鞭,所忻慕焉

### 說苑節錄

不賞而民勸,不罰而民治。先恕而後教,是堯道也。」(君道) 也。』一民有罪,則曰:『此我陷之也。』仁昭而義立, 不遂也。有一民飢,則曰:『此我飢之也。』有一人寒,則曰:『此我寒之 河間獻王曰:「堯存心於天下,加志於窮民,痛萬姓之罹罪,憂眾生之 ,德博而 化廣 故

王 人為君也,百姓各自以其心為心,是以痛之也。」《書》曰:「百姓有罪, |何為痛之至於此也?」禹曰:「堯、舜之人,皆以堯、舜之心為心。今寡 禹 出 見罪人,下車問而泣之。左右曰:夫罪人不順道,故使然焉,君

虞人與芮人質其成於文王。,入文王之境,則見其人民之讓為士大夫;

在予一人。」

(君道)

敬忌。」此之謂也。 不動 身,而讓其所爭以為閑田而反。孔子曰:「大哉文王之道乎!其不可加矣! 士大夫讓為公卿,然 λ **其國**, 而 變,無為而成,敬慎恭己而虞、芮自平。」故《書》曰:「惟文王之 則見其士大夫讓為公卿。二國者相謂曰:「其人民讓為士大夫 (君道) 則此其君亦讓以天下而不居矣。」二國者未見文王之 ,其

祥也。所謂不祥,乃若此者也。。今山上見虎,虎之室也,下澤見蛇,蛇 獵,上山則見虎,下澤則見蛇,殆所謂之不祥也?」晏子曰:「國有三不祥, 是不與焉 之穴也,如虎之室,如蛇之穴而見之,曷為不祥也?」(君道) 齊景公出獵,上山見虎,下澤見蛇。歸召晏子而問之曰:「今日寡人出 。夫有賢而不知,一不祥;知而不用,二不祥;用而不任,三不

高宗者,武丁也,高而宗之,故號高宗。成湯之後,先王道缺,刑法

四力

違 之,吾弗得言也。聞諸祖己,桑穀者,野草也,而生於朝,意者亡國乎?」 '犯,桑穀俱生乎朝,七日而大拱。武丁召其相而問焉。其相曰:「吾雖知

武丁恐駭,飭身修行,思先王之政,興滅國,繼絕世,舉逸民,明養老。 三年之後,蠻夷重譯而朝者七國,此之謂存亡繼絕之主,是以高而尊之也。

(君道)

寡人之過也。懸琴於城門,以為寡人符;不補旒,以為寡人戒。」(君道) 君也,唯恐言而人違之。臣撞桀、紂,非撞吾君也。」文侯曰:「釋之,是 侯,不中,中旒潰之。文侯謂左右曰:「為人臣而撞其君,其罪 曰:「可。」師經曰:「昔堯、舜之為君也,唯恐言而人不違;桀、紂之為 右曰:「罪當烹。」提師經下堂一等。師經曰:「臣可一言而死乎?」文侯 師經鼓琴,魏文侯起舞,賦曰:「使我言而無見違。」師經援琴而撞文 如何?」左

存之國富大夫,亡道之國富倉府,是謂上溢而下漏。」文王曰:「善。」對 文王問於呂望曰:「為天下若何?」對曰:「王國富民,霸國富士,僅

曰:「宿善不祥。」是日也,發其倉府以賬鰥寡孤獨。 (政理)

猶未足也。」曰:「不齊也所父事者三人,所兄事者五人,所友者十一人。」 父其父,子其子,恤諸孤而哀喪紀。」孔子曰:「善,小節也,小民附矣, 孔子謂宓子賤曰:「子治單父而眾說,語丘所以為之者。」曰:「不齊

昔者堯、舜清微其身,以聽觀天下,務來賢人。夫舉賢者,百福之宗也, 以 孔子曰:「父事三人,可以教孝矣;兄事五人,可以教弟矣;友十一人,可 而神明之主也。不齊之所治者小也,不齊所治者大,其與堯、舜繼矣。」(政 人,不齊事之,皆教不齊所以治之術。」孔子曰:「欲其大者,乃於此在矣。 教學矣。中節也,中民附矣,猶未足也。」曰:「此地民有賢於不齊者五

理)

景公好

使服 吏禁女子而男子飾者,裂其衣,斷其帶,相望而不止者,何也?」對曰:「君 飾 者,裂其衣,斷其帶。」裂衣斷帶相望而不止。晏子見,公曰:「寡人使 之於 內,而禁之於外,猶懸牛首於門,而求買馬肉也;公胡不使內勿

服

,

則外莫敢為也。」公曰:「善!」使內勿服,不旋月,

而國莫之服也。

政理)

與 人相 犯也,曰:「轂擊者不祥,臣其祭祀不順,居處不敬乎?」下車棄而

齊人甚好轂擊相犯以為樂,禁之不止。晏子患之,乃為新車良馬

, 出

其 去之,然後國人乃不為。故曰:「禁之以制而身不先行也,民不肯止。故化 心莫若教也。」(政理)

魯國之法,魯人有贖臣妾於諸侯者,取金於府;子貢贖人於諸侯而還

廉,不受則後莫復贖。自今以來,魯人不復贖人矣。」孔子可謂通於化矣。 施於百姓,非獨適其身之行也。今魯國富者寡而貧者眾,贖而受金則為不 其金。孔子聞之曰:「賜失之矣!聖人之舉事也,可以移風易俗,而教導可

故老子曰:「見小曰明。」 (政理)

子曰:「賜,汝徒知其一,不知其二,汝聞進賢為賢耶?用力為賢耶?」子 有鮑叔,鄭有子皮,賢者也。」子貢曰:「然則齊無筦仲, 子貢問孔子曰:「今之人臣孰為賢?」孔子曰:「吾未識也。往者,齊 鄭無子產乎?」

貢曰:「進賢為賢。」子曰:「然。吾聞鮑叔之進筦仲也;聞子皮之進子產 也;未聞筦仲、子產有所進也。」 (臣術) 高 繚 住於晏子,晏子逐之,左右諫曰:「高繚之事夫子三年,曾無以爵

位而逐之,其義可乎?」晏子曰:「嬰,仄陋之人也,四維之然後能直。今

五. 四

此子事吾三年,未嘗弼吾過,是以逐之也。」 (臣術)

育焉,生人立焉,死人入焉,多其功而不言。,為人下者,其猶土乎!」(臣 下者,其猶土乎!種之則五穀生焉 子貢問孔子曰:「賜為人下,而未知所以為人下之道也。」孔子曰:「為 , 掘 之則甘泉出焉,草木植焉 禽獸

術

壺漿。孔子聞之,使子貢復之。子路忿然不悅,往見夫子曰:「由也以暴雨 行仁也,由也不受。」子曰:「爾以民為餓,何不告於君,發倉廪 將至,恐有水災 壺漿 子路為蒲令,備水災,與民春修溝瀆。為人煩苦,故予人一簞食,一 而 夫子使賜止之,何也?夫子止由之行仁也!夫子以 ,故與人修溝瀆以備之,而民多匱於食,故與人一簞食、 以給食之? 仁 教 而 禁其

而

以爾私饋之,是汝不明君之惠,見汝之德義也。速已則可矣,否則爾之

之以善 其節 親戚 臣道 貴乎人 不說 處喪有禮矣,而哀為本;戰陣有隊矣,而勇為本;政治有理 居國有禮矣 忠。 ,慎其施。子年七歲以上,父為之擇明師,選良友,勿使見惡,少漸 ,無務修遠 不悅,無務外交;事無終始,無務多業;聞記不言,無務多談;比近 孔子曰:行身有六本,本立焉,然後為君子。立體有義矣,而孝為本; 1,使之早化。故賢子之事親,發言陳辭,應對不悖乎耳; 趣走 。人之道,莫大乎父子之親、君臣之義。父道聖,子道仁;君道 賢父之於子也,慈惠以生之,教誨以成之。養其誼 , 而嗣為本;生才有時矣,而力為本。置本不固,無務豐末; 。是以反本修邇, 君子之道也。天之所生,地 矣 ,藏 , 之所養,莫 而 其偽 能 進退 為本; , 時 義

容貌

不悖乎目;卑體賤身不悖乎心。君子之事親以積德,子者,親之本也

推而不從命者,惟害親者也。故親之所安,子皆供之。

五 五

無

所推而不從命。

賢臣之事君也,受官之日,以主為父,以國為家,以士人為兄弟。故苔有 矣 可 之行莫大於孝。」孝行成於內而嘉號布於外,是謂建之於本,而榮華自茂 之,以遂其德。夫君臣之與百姓,轉相為本,如循環無端。夫子亦云:「人 以 安國家、利人民者,不避其難,不憚其勞,以 君 以臣為本, 臣 以君為本;父以子為本,子以父為本,棄其本者 成其義。故其君亦有助

華槁

矣。

(建本)

琴而歌,欲令曾皙聽其歌聲,令知其平也。孔子聞之,告門人曰:「參來, 然 勿內也。」曾子自以無罪,使人謝孔子。孔子曰:「汝聞瞽叟有子,名曰 而 起,進曰:「曩者參得罪於大人,大人用力教參,得無疾乎?」退屏鼓 曾子芸瓜而誤斬其根,曾晳怒,援大杖擊之,曾子仆地。 有 頃蘇 蹶

舜之事父也,索而使之,未嘗不在側

,求

而殺之,未嘗可得。小

棰

則待

父不

大棰則走,以

逃暴怒也。今子委身以待暴怒,立體而不去,殺身以陷

材 義 , 又居孔子之門,有罪不自知,處義難乎! (建本) 不孝 ·孰是大乎?汝非天子之民邪?殺天子之民,罪奚如?」 以曾子之

紳 封 從 必 饗其樂 為博陽侯 而 大將軍長史轉遷至禦史大夫,宣帝聞 邴 封之,及其生也。太子太傅夏侯勝曰:「此未死也。臣聞之:有陰德者 吉有陰德於孝宣皇帝微時。孝宣皇帝 以 及其子孫。今此未獲其樂而病甚,非具死病也。」後病果愈 ,終饗其樂 (復恩) 之,將封之。會吉病甚,將 即位,眾莫知 ,吉亦 不 使人加 。吉

禹 以 夏王 ,桀以夏亡;湯以殷王 , 紂 以殷亡。闔廬以吳戰勝無敵

於天

0

望 以 下 齊 夷,其所以君王者同,而 強 而 夫差 於 天 下 以 見禽於 , 而 湣 越 王 以 ,文公以 弒 功 死 跡 於 晉國霸 不等者,所任異也! 廟 梁 , 穆 , 公 而 厲 以 公以 秦 顯名尊號 見弑 於 匠麗 ,而二世以 之 宮 , 劫於 威 王

牙 烙 佐 士 楚 子 之 立 以 丘 無忌 賊 其 有 之 不 , 於 , , 身 申 所 務 是 也 本 刑 而 任 包骨 李兌 為 故 朝 而 多 能 , 死 削 鮑 之 殷 , 不 成 , 以 地 葬 順 民 而 成 叔 則 故 王 , 從 務 復得 也 處 於 而 , 為 以 天 功 為賢於 民 得 下 , 立 昭 0 襁 湯去 賢俊 ら い 名 王 , 天 桓 褓 之 豪 趙 下 也 反 公 而 , 己而 。得 安危 張 位 任 笶 得 朝 0 , 藺 管 故 ; 。 — 諸 相 網 進 聲 者 民 齊 仲 率 相 侯 繼 之為 之三 人 同 ら 有 如 而 絕 , , 者 之身 趨 則 者 田 , 九 周 單 面 秦 相 處 民 合 公 之 , 未 矣 異 往 兵 諸 用 , 而 , , 榮辱 之 , 襄 セ 夏 嘗 侯 事 而 不 0 十 民 有 敢 何 相 王 , 也 有賢佐 言 也 出 應 從 得 俱 以 0 趙 ; 而 知 國 施 匡 , , 0 武 說 其 德 越 故 鄢 焉 天 0 合 靈 乃 然 王 者 國 由 陵 , 下 聽 則 士 此 在 不隳舊 任 , 王 也 不 ? 未 歸 五 , 務 觀 唐 所 失 遂 見 之 任 管 十 日 大 之 睢 年 使 塚 , , 也 仲 而 而 , 桓 管 相 文 而 而 務 國 國 0 , 公除 吳 故 餓 仲 親 王 無 獨 得 任 人 請 民 賢 特 魏 豎 死 , 報 賢 服 除 佐 於 桓 ジ 立 有 刁 者 俊 易 讎 公 炮 公 沙 , 0

之

ジ

而

委

或

政

焉

失之者 今也 楚至 尚 走 能 子 而 之 與 而求 信意至 鄧元 Ü 如是其厚也, , 夫 者 ,於是舉兵而 鄧元 桓公 逮前 則危亡,自古及今,未有不然者也。明鏡所以照形也,往古所以知 去陳;自是之後 , 同 也。 知 垂 於 聲 惡往古之所以危亡,而不務襲跡 拱 此 人也。太公 燕昭 於 無事 者 況當世而生存者乎!則其弗失可識 鮑叔也。紂殺 ,由得士也。故無常安之國,無恆治之民;得賢者則安昌, 王得郭隗 攻 而 齊 朝諸 () 般兼 知 , **棲閔王於莒**, 之,故舉微子之後 侯 , 而 , 於周,陳亡於楚,以其殺比干、泄冶而 王子比干,箕子被髮而 鮑 鄒衍、樂毅 叔 之力也;管仲之所 燕校地計眾,非與 以齊、趙至,蘇子、屈景 而封比干之墓 於 其所以安昌 矣。 以能 佯 狂 ,陳靈 北 ,夫聖人之於死 , 則 齊均也, 走桓 未有異乎卻 公殺 公無自危 然 以周、 失箕 所以 泄冶

銳者。」哀公曰:「何謂也?」孔子曰:「拙者大給利 , 不可 五. 九

健者

, 毋

取

口

哀

公問

於

孔子曰:「人若何而可取也?」

孔子對曰:「毋取

抽者

無取

其胸 然後求其知能焉。今有人不忠信重厚而多智能,如此人者,譬猶豺狼與, 言揆其行,雖有姦軌之人,無以逃其情矣。」哀公曰:「善。」 (尊賢) 之 ; 夫弓矢和 不可以身近也。是故先其仁義之誠者,然後親之;於是有智能者,然後任 而發其情者也,能行之士,必能言之,是故先觀其言而揆其行,夫以 故曰: 調,而後求其中焉;馬愨願順,然後求其良材焉;人必忠信重厚, 親 仁而使能 。夫取人之術也,觀其言而察其行,夫言者所以抒

盡用

;健者必欲兼人,不可以為法也;口銳者多誕而寡信,後恐不驗也。

六〇

害霸;信而復使小人參之,害霸。」桓公:「善。」(尊賢) 管仲對 仲對曰:「此極非其貴者耳;然亦無害於霸也。」桓公曰:「何如而害霸?」 桓公問於管仲曰:「吾欲使爵腐於酒,肉腐於俎,得無害於霸乎?」管 ·曰:「不知賢,害霸;知而不用,害霸;用而不任,害霸;任而不信

我胡守先生之舍?」魯人果攻鄭而數之罪十,而曾子之所爭者九。魯師罷, 吾舍。」鄭君曰:「寡人之於先生也,人無不聞;今魯人攻我而先生去我 魯人攻擊,曾子辭於鄭君曰:「請出,寇罷而後復來,請姑毋使狗豕入

**鄭君復修曾子舍而後迎之。** 

(尊賢)

賢) 而 不能用也,賤不肖而不能去也;賢者知其不己用而怨之,不肖者知其賤己 路 讎之。賢者怨之,不肖者讎之;怨讎並前,中行氏雖欲無亡,得乎?」(尊 曰:「范、中行氏尊賢而賤不肖,其亡何也?」曰:「范、中行氏尊賢而 子路問於孔子曰:「治國如何?」孔子曰:「在於尊賢而賤不肖。」子

而 死,臣請為君數之,令知其罪而殺之。」公曰:「諾。」晏子舉戈而臨之 景公有馬,其圉人殺之,公怒,援戈將自擊之。晏子曰:「此不知 其罪

死;汝使吾君以馬故殺人,聞於 四鄰諸侯, 汝罪又當死。」公曰:「夫子

而罪當死;汝使吾君以馬之故殺圉人,

而

罪又

當

曰:「汝為吾君養馬而殺之,

釋之!夫子釋之!勿傷吾仁也。」 (正諫)

得之;兄 婦 紂 , 士 嘿嘿而亡。君無諤諤之臣,父無諤諤之子,兄無諤諤之弟 孔子曰:「良藥苦於口利於病,忠言逆於耳利於行」。故武王諤諤 無 失之 : 諤諤之友,其亡可立而待 , 弟得之; 夫失之, 婦得之;士失之, 。故 曰:君失之,臣得之;父失之,子 友得之 0 ,夫無諤諤之 故無亡國破 而

悖父亂子,放兄棄弟,狂夫淫婦,絕交敗友。

(正諫)

莫 而 顯 以存身全國者亦難矣。《詩》曰:「戰戰兢兢,如臨深淵,如履薄冰。」 乎微。」 存 七 禍 福 故君子能慎其獨也。諺曰:「誠無詬,思無辱。」夫不誠 ,其要在身。聖人重誡,敬慎所忽。《中庸》曰:「莫見乎隱 不思

此之謂也。(敬慎)

乎?」對曰:「然。」孔子使子路取水而試之,滿則覆,中則正,虚則欹 訥 而 孔子曰:「持滿之道,挹而損之。」子路曰:「損之有道乎?」孔子曰:「高 孔子喟然歎曰:「嗚呼,惡有滿而不覆者哉!」子路曰:「敢問持滿有道乎?」 為 曰:『不損而益之,故損;自損而終,故益。』」(敬慎) ,博 能 右坐之器。」孔子曰:「吾聞右坐之器,滿則覆,虛則欹,中則正 下 孔子觀於周廟而有欹器焉,孔子問守廟者曰:「此為何器?」對曰:「蓋 而 能淺 滿而能虛, 明明 而 能閣,是謂損而不極。能行此道,唯至德者及之。《易》 富而能儉,貴而能卑,智而能愚,勇而能怯,辯而能 ,有之

**夫剛則不和,不和則不可用。是故四馬不和,取道不長;父子不和,其世** 桓公曰:「金剛則折,革剛則裂;人君剛則國家滅,人臣剛則交友絕。」

破亡;兄弟不和,不能久同;夫妻不和,家室大凶。《易》曰:「二人同心, 六 四

其利斷金。」由不剛也。 (敬慎)

則不失財 為善者,天報以福;人為不善者,天報以禍也。故曰:「禍兮福所倚,福兮 禍所伏。」戒之慎之。君子不務,何以備之?夫上知天則不失時,下知地 《老子》 。日夜慎之,則無害災。(敬慎) 曰:「得其所利,必慮其所害;樂其所成,必顧其所敗。」人

山 雖 為卑而 無能 曾子有疾,曾元抱首,曾華抱足。曾子曰:「吾無顏氏之才,何以告汝? ,君子務益。夫華多實少者,天也;言多行少者,人也。夫飛鳥以 層巢其巔 ,魚鱉以淵為淺而穿穴其中,然所以得者 ·, 餌 也。君子

苔 情,孝衰於妻子。察此四者,慎終如始。《詩》曰:「靡不有初,鮮克有終。」 能 無以 利害身,則辱安從至乎?」官怠於宦成,病 加於少愈,禍生於解

(敬慎)

親戚 惟天 不黨 也。 是 達 直 以 躧 公 也。貴為天子,富有天下,得舜而傳之,不私 如 。於天下 為大,惟堯則之。」《易》曰:「無首,吉。」此蓋人君之至公也。夫 詐 矢 彼 與天下,其德大矣!推之於此,刑之於彼,萬姓之所載 ,伊、呂是也。故顯名存於今,是之謂公。《詩》雲:「周道 ,奉公舉賢則不 《書》曰:「不偏不黨,王道蕩蕩。」言至公也。古有行大公者,帝堯 偽 人臣之公 ,君子 生塞 猶然 ,所履 ,誠信生神 ,況其細於天下乎!非帝堯孰能行之?孔子曰:「巍巍 ,治官事則不營私家 ;小人 避 仇 所視 ,夸誕 讎 0 此此 忠於事君 生惑 ,此六者 之謂也。夫公生明,偏 ,在公門則不言貨利 , 仁 於利下,推之以 , 君子之所慎也 於其子孫也。去 ,當公 恕道 生 ,後世之 , 暗 如砥 , 行 法 而 天下若遺 禹 端殼生 則 、桀 所則 , 其 之以 不 乎, 阿

之所以分也。《詩》云:「疾威上帝,其命多僻。」言不公也。 (至公)

六五

出獵而遺其弓,左右請求之,共王曰:「止,楚人遺弓,楚人得 六 六

之 而已,何必楚也。」仲尼所謂大公也。 (至公) ,又何求焉?」仲尼聞之曰:「惜乎其不大。亦曰:『人遺弓,人得之』

楚共王

不行於君,澤不加於民則處。孔子懷天覆之心,挾仁聖之德,憫時俗之污 孔 子生於亂世,莫之能容也。故言行於君,澤加於民,然後仕;。言

非欲私身運德於一城,將欲舒之於天下,而建之於群生者耳。 (至公) 不被 世諸侯莫 泥 , 傷 其恩。故喟然 紀 能 綱之廢壞 任 用 。是 而歎曰:「而有用我者,則吾其為東周乎!」故孔子行說 服 以 德積而 重歷遠,周流應聘,乃俟幸施道,以子百 不肆,大道屈 而不伸, 海內不蒙其化 姓 ,群生 , 而 當

趙宣子言韓獻子於晉侯曰:「其為人不黨,治眾不亂,臨死不恐。」晉

侯 以為中軍尉

其主朝昇之而暮戮其僕,誰能待之?」役罷,趙宣子觴大夫,爵三行,曰: 言之而不當,必受其刑。今吾車失次而戮之僕,可謂不黨矣。是吾言當也。」 二三子再拜稽首曰:「不惟晉國適享之,乃唐叔是賴之,敢不再拜稽首乎?」 「二三子可以賀我。」二三子曰:「不知所賀。」宣子曰:「我言韓厥於君, 河曲之役,趙宣子之車干行,韓獻子戮其僕,人皆曰:「韓獻子必死矣

(至公)

公) 公曰:「非汝之讎也?」對曰:「君問可為守者,非問臣之讎也。」羔見咎 公也;怨子者,私也。吾不以私事害公義,子其去矣,顧吾射子也。」(至 犯而謝之曰:「幸赦臣之過,薦之於君,得為西河守。」咎犯曰:「薦子者, 晉文公問於答犯曰:「誰可使為西河守者?」答犯對曰:「虞子羔可也。」

門,曰:「於彼有缺。」子羔曰:「君子不踰。」曰:「於彼有竇。」子羔曰:

子羔為衛政,則人之足。衛之君臣亂,子羔走郭門,郭門閉,則者守

六八

「君子不遂。」曰:「於此有室。」子羔入,追者罷。子羔將去,謂刖者曰:·

吾不能虧損主之法令,而親則子之足。吾在難中,此乃子之報怨時也,

先後 樂,見於顏色,臣又知之。君豈私臣哉?天生仁人之心,其固然也,此臣 何故逃我?」則者曰:「斷足固我罪也,無可奈何。君之治臣也,傾 臣以 法,欲臣之免於法也,臣知之。獄決罪定,臨當論刑,君愀然不 側法令,

謂歟! 孔子聞之,曰:「善為吏者樹德,不善為吏者樹怨。公行之也,其子羔 (至公)

之所以脫君也。」

彌子瑕愛於衛君。衛國之法,竊駕君車罪則。彌子瑕之母疾,人聞,

罪哉!」君遊果園,彌子瑕食桃而甘,不盡而奉君。君曰:「愛我而忘其口 味。」及彌子瑕色衰而愛弛,得罪於君,君曰:「是故嘗矯吾車,又嘗食我 夜 以餘桃。」故子瑕之行未必變初也,前見賢後獲罪者,愛憎之生變也。 往告之。彌子瑕擅駕君車而出,君聞之,賢之曰:「孝哉!為母之故犯則 へ 雑

言

楚王遂止。夫善惡之難 處 諂諛常興也。故有千歲之亂,而無百歲之治。孔子之見疑,豈不痛哉! (雜 聖王。今以孔子之賢,而有書社七百里之地,而三子佐之,非楚之利也。」 兵有如子路者乎?使諸侯有如宰予者乎?長管五官有如子貢者乎?昔文王 酆 楚昭王召孔子,將使執政而封以書社七百。子西謂楚王曰:「王之臣用 ,武王處鎬 ,酆、鎬之間,百乘之地,伐上殺主,立為天子,世皆曰 ,分也,聖人獨見疑,而況於賢者乎?是以賢聖罕合,

和汝。」子路歌,孔子和之,三終而甲罷。 (雜言) 禮樂之不修,是丘之過也。若似陽虎,則非丘之罪也,命也夫!由歌,予 奮戟將下門。孔子止之曰:「何仁義之不免俗也。夫《詩》、《書》之不習, 孔子之宋,匡簡子將殺陽虎,孔子似之。甲士以圍孔子之舍,子路怒,

人也,何若?」曰:「由之勇,賢於丘也。」曰:「子張之為人也,何若?」 曰:「子貢之為人也,何若?」曰:「賜之敏,賢於丘也。」曰:「子路之為 子夏問仲尼曰:「顏淵之為人也,何若?」曰:「回之信,賢於丘也。」

師能莊而 之利,屈伸之用者也。 曰:「坐,吾語汝。回能信而不能反,賜能敏而不能屈,由能勇而不能怯, 曰:「師之莊,賢於丘也。」於是子夏避席而問曰:「然則四者何為事先生?」 不能同。兼此 四子者,丘不為也。」夫所謂至聖之士,必見進退 (雑言)

未 人則不然,其未之得則憂不得;既已得之又恐失之。是以有終身之憂,無 得,則樂其意;既已得,又樂其知。是以有終身之樂,無一日之憂。小 子路問孔子曰:「君子亦有憂乎?」孔子曰:「無也。君子之修其行,

日之樂也。」

(雑言)

行之,然後道之,是夫子之能勞也。夫子之能勞也,夫子之不爭也,夫子 是夫子之易事也;夫子見人有善若己有之,是夫子之不爭也;聞善必躬親 之易事也,吾學夫子之三言而未能行。」(雜言) 曾子曰:「吾聞夫子之三言,未之能行也。夫子見人之一善而忘其百非,

仲尼曰:「新交取親,其忠乎;言寡可行,其信乎;長為善士而無犯

而

無犯若何?」

子路

行,辭於仲尼曰:「敢問新交取親若何?言寡可行若何?長為善士

七

其禮乎。」 (雜言)

言 。」仲尼曰:「不強不遠,不勞無功,不忠無親,不信無復,不恭無禮 子路將行,辭於仲尼,曰:「贈汝以車乎?以言乎?」子路曰:「請以

慎此五者,可以長久矣。」 (雜言)

眾言不逆,可謂知言矣;眾向之,可謂知時矣。」(雜言) 孔子曰:「以富貴為人下者,何人不與?以富貴敬愛人者,何人不親?

不可得也;達而能達人者,欲窮而不可得也。」 (雜言) 孔子曰:「夫富而能富人者,欲貧而不可得也;貴而能貴人者,欲賤而

善 魚之肆,久而不聞其臭,亦與之化矣。」故曰:丹之所藏者赤,烏之所藏 人居,如入蘭芷之室,久而不聞其香,則與之化矣;與惡人居,如 孔子曰:「不知其子,視其所友;不知其君,視其所使。」又曰:「與 入鮑

者黑。君子慎所藏。(雜言)

# 誠兄子嚴敦書 馬援

援兄子嚴、敦,並喜譏議,而通輕俠客。援前在交趾,還書誡之曰:

汝曹 好 論議人長短 知吾惡之甚矣,所以復言者,施矜結褵 吾欲汝曹聞人過失,如聞父母之名,耳可得聞,而 ,妄是非正法 ,此吾所大惡也,寧死不願聞子孫有此行也。 ,申父母之戒 , 欲 口不可得言也。 使汝曹不忘

#### 之耳!

客,數郡畢至。吾愛之重之,不願汝曹效也。效伯高不得, 汝曹效之。杜季良豪俠好義,憂人之憂,樂人之樂,清濁無所失;父喪致 龍 伯 高 敦厚周慎 , 口無擇言, 謙約節儉,廉公有威。吾愛之重之 猶為謹敕 之士, 願

所謂刻鵠不成

,尚類鶩者也。效季良不得,陷為天下輕薄子

,所謂畫虎不 七二

常為寒心,是以不願子孫效也。」 成,反類狗者也。訖今季良尚未可知,郡將下車輒切齒,州郡以為言,吾

# 前出師表 諸葛亮

危急存 不宜妄自菲薄 之殊遇,欲報之於陛下也。誠宜開張聖聽,以光先帝遺德,恢宏志士之氣; 臣亮言:先帝創業未半,而中道崩殂。今天下三分,益州罷弊 亡之秋也。 ,引喻失義,以塞忠諫之路也。 然侍衛之臣不懈於內,忠志之士忘身於 外者,蓋追先帝 ,此誠

,宜付有司論其刑賞,以昭陛下平明之理;不宜偏私,使內外異法 宮中 府中,俱為一體,陟罰臧否,不宜異 同。若有作姦犯科及為忠善 也。

簡 拔以遺陛下。愚以為宮中之事,事無大小,悉以咨之,然後施行,必能 侍 中 、侍 郎郭攸之、費禕、董允等,此皆良實,志慮忠純,是以 先帝

裨補闕漏,有所廣益

以 眾議舉寵為督 將 軍 - 向寵 , 性 0 愚以為營中之事,悉以咨之 行淑 均,曉暢軍事,試用於昔日,先帝稱之曰「能」,是 ,必能使行陣 和 睦 , 優劣得

所。

尚 可 傾 計日 書、長史、參軍,此悉貞亮死節之臣也,願陛下親之信之,則漢室之隆, 頹 親賢臣 也。先帝在時,每與臣論此事,未嘗不歎息痛恨於桓、靈也。 而 待也。 ,遠小人,此先漢所以興隆也;親小人,遠賢臣 , 此後漢所以 侍中、

遂 以 許先帝以驅馳 臣卑鄙 臣本布衣,躬耕於南陽,苔全性命於亂世,不求聞達於諸侯。先帝不 , 猥自 。後值傾覆 枉 屈 ,三顧臣於草廬之中,諮臣 ,受任於敗軍之際,奉命於危難之間 以當世之事。由是感激 爾爾 來二 ,

七 五

### 十有一年矣!

禕 臣 當獎率三軍, 不 一之所以 效 、允之任 , 先帝 以 報先帝而忠陛下之職分也。至於斟酌損益,進盡忠言,則攸 傷 知 也 先 臣謹慎 九帝之明 北定中原 ,故臨崩寄臣以大事也。受命以來,夙夜憂勤 0 ,庶竭 故 五月 渡瀘 , 深 , 攘 低除姦凶 入不毛。今南方已定,兵甲已足 , 興復漢室,還於舊 ,恐託付 都。此 之

善道 興德之言 , 察 願 陛下託臣以討賊興復之效,不 納 ,則責攸之、 雅言,深追先帝遺詔 禕 、允等之慢 ,臣不勝受恩感激 效則治臣之罪,以告先帝之靈 ,以彰其咎。 陛 下亦宜自課 ; 以 。若 咨諏 無

今當遠離,臨表涕泣,不知所云

0

七六

## 誠子書 諸葛亮

勵精,險躁則 遠 '。夫學須靜也,才須學也, 夫君子之行 不能治性。年與時馳,意與日去,遂成枯落,多不接世,悲 , 靜 以修身, 非學無以廣才,非志無以成學。淫 儉以養德 。非 澹泊 無以 明志 非 寧 靜 慢 則 無 不能 以 致

### 六朝文

守窮廬,

將復何及!

### 陳情表 李密

臣密言:臣以 險釁,夙遭閔凶。生孩六月,慈父見背。行年 四 歲 舅

奪母志。祖母劉愍臣孤弱,躬親撫養。臣少多疾病,九歲不行;零丁 至于成立 0 既 無伯 叔 ,終鮮兄弟;門衰祚薄,晚有兒息。外無朞功強近之 孤苦,

無應門五尺之僮。榮榮獨立,形影相弔。而劉夙嬰疾病,常在床蓐;

親

內內

七七

臣 侍 湯藥 , 未曾廢離

才; 奉 馬 詔 書 臣 切 猥 逮 奉 峻 以 以 微 供 聖 , 責 養 賤 朝 無主 臣 , ,當侍 逋慢; 沐 , 浴 辭 東 清 宮 郡 不 化 縣 , 非 赴命 前 逼 迫 臣 0 太 , 隕 守 詔 催 首 書 臣 臣 特 逵 所 能 下 上道; , 察 上 , 報 拜 臣孝廉 州 0 臣 司 臣 郎 中 臨 具 門 以 後 0 尋蒙 ,急於 表 刺 史臣 聞 , 國 星火 辭 恩 榮 , 不 舉 0 就 除 臣 職 臣 臣 欲 洗 秀 0

奄奄 餘年 陋 且 臣 詔 少 奔 , 人 過蒙 伏 母孫二人 惟 仕 馳 命危淺 拔 偽 聖 , 則 擢 朝 朝 劉 以 , , 孝治 病 , 寵 歷 , 朝 日篤 更 命 職 相 優 天 不 郎 ; 渥 為命 慮夕 署 下, 欲 ; , 苔 凡 豈 本 0 0 順 是 臣 在 圖 敢 私 以 無 盤 宦 故 情 區 達 老 袓 桓 , 區不 母 , , , 則 猶蒙 有 不 , 告訴 能 無 矜 所 希冀? 矜育; 廢遠 以 名 不許 節 至 今日; 0 0 0 臣 今臣 況臣 但 臣 密 以 之 今年 祖 劉 亡 孤 進退, 國 苦 母 日 賤 無 薄 , 四 十 特 俘 實為 臣 西 有 為 , 山 , 四 無 至 尤 , 狼 甚 氣 微 , 以 狽 袓 終 息 至 0

母劉今年九十有六,是臣盡節於陛下之日長,報養劉之日短也。烏鳥私情

願乞終養

共鑒。願陛下矜愍愚誠 死當結草。臣不勝犬馬怖懼 臣 之辛苦,非獨蜀之人士,及二州牧伯,所見明知;皇天后土,實所 ,聽臣微志。庶劉僥倖,保卒餘年。臣生當隕首, 之情 ,謹拜表以聞

# 歸去來兮辭 陶淵明

往 之不諫,知來者之可追;實迷途其未遠,覺今是而昨非 歸去來兮,田園將蕪胡不歸?既自以心為形役,奚惆悵而獨悲!悟已

宇,載欣載奔。僮僕歡迎,稚子候門。三徑就荒,松菊猶存 舟遙 遙 以 輕 7颺,風 飄 飄而吹衣,問征夫以前路,恨晨光之熹微。 7。攜幼 乃瞻 室

有酒盈鐏

0

引壺觴以自酌,眄庭柯以怡

顏

,倚南窗以寄傲

,審容膝之易安

七九

出 園 岫 日 涉 ,鳥 以 成 倦飛而知還。景翳翳以將入,撫 趣,門雖 設 而常關 0 策 扶老以流 孤 松而盤 焼憩, 時 桓 **矯首而** 遐觀。 雲無 心以

萬 情 孤 物 舟 話 之得時 歸 已矣乎!寓形宇 0 ,樂琴書以消憂。農人告余以 既窈窕 去來兮,請息交 ',感吾生之行休 以尋壑 內 , 亦崎嶇 復幾時?曷 以絕游 而 , 經 世與我 春及 丘 不委 0 木 心任 ,將有事乎西疇。或命巾車,或棹 而 欣 相違 欣以 去留?胡 ,復駕言兮焉求?悅親戚之 向榮 為遑遑欲 ,泉涓涓 何之?富貴 而 始 流 0 羨

清 非 流 吾 而 願 賦 帝 詩 0 鄉 聊 不 乘化以 可 期 0 歸盡,樂夫天命復奚疑? 懷 良 辰 以 孤 往 , 或 植 杖 而 耘 耔 0 登東皋以 舒嘯 , 臨

#### 唐文

# 諫太宗十思疏 魏徵

國之治 之大 安者 其厚,情不勝其欲;斯亦伐根以求木茂 ,將崇極 臣聞:求木之長者 , 雖 必 積其德義 在下愚, 天之峻,永保無疆之休,不念居安思危,戒奢以儉 0 知其不可,而 源 ,必固其根本;欲流之遠者,必浚其泉源;思國之 不 深 而 望流 之遠 況於明哲乎?人君當神器 ,塞源而欲流長者也 , 根 不 固 而 求木 之長 之重,居域 , 德 ,德不處 不 厚 而 中 思

越為一體;傲物 何也?夫在殷 能克終者蓋寡 憂 。豈其 , , 則骨肉為行路。 必 竭 取之易而守之難乎?昔取之而 誠 以 待 下; 既得志 雖董之以嚴刑, , 則 縱 情 震之以威怒,終苔免而 有餘,今守之而不足 以 傲 物 0 竭 誠 , 則 胡

凡百元首,承天景命,莫不殷憂而道著,功成而德衰。有善始者實繁,

車朽索,其可忽乎? 不懷仁,貌恭而不心服。怨不在大,可畏惟人;載舟覆舟,所宜深慎。奔

以為度;憂懈怠 念高危,則思謙沖以自牧;懼滿溢,則思江海下百川;樂盤遊 君人者,誠能見可欲,則思知足以自戒;將有所作,則思知止以安人; ,則思慎始而敬終;慮壅蔽 ,則思虛心 以納下; ,則思三驅 想讒邪

者竭 則思 刑 之樂,可以養松 正 其力,仁者播其惠,信者效其忠。文武爭馳,君臣無事,可以盡豫遊 總此 身以 十思,弘茲 黜 惡;恩所 喬之壽,鳴琴垂拱,不言而化。何必勞神苦思,代下司職 九德 加 0 , 簡 則 能 思無因喜以謬賞;罰 而 任 之,擇善而從之, 所及 則智者盡其謀 ,則思無 因 怒 而 勇 濫

役聰明之耳目,

虧無為之大道哉?

## 陋室銘 劉禹錫

山不在高 ,有僊則名。水不在深,有龍則靈。斯是陋室, 惟吾德馨

苔痕上階綠,草色入簾青。談笑有鴻儒,往來無白丁。可以調素琴,閱金 經。無絲竹之亂耳,無案牘之勞形。南陽 諸葛廬,西蜀 子雲亭。孔子云:

「何陋之有?」

### 雜說四 韓愈

祇辱於奴隸人之手,駢死於槽櫪之間,不以千里稱也。 世有伯樂,然後有千里馬。千里馬常有,而伯樂不常有。故雖有名馬,

安求其能千里也? 也 ,雖有千里之能,食不飽,力不足,才美不外見,且欲與常馬等不可得, 馬之千里者,一食或盡粟一石。食馬者,不知其能千里而食也。是馬

八二

策 之不以其道,食之不能盡其材,鳴之而不能通其意,執策而臨之曰:

天下無馬。」嗚呼!其真無馬耶?其真不知馬也!

### 師 說 韓愈

孰能無惑?惑而不從師,其為惑也,終不解矣。 古之學者必有師 。師者,所以傳道、授業、解惑也。人非生而知之者

貴、無賤 亦先乎吾,吾從而師之。吾師道也。夫庸知其年之先後生於吾乎!是故無 生乎吾前 、無長、無少,道之所存,師之所存也。 ,其聞道也,固先乎吾,吾從而師之。生乎吾後,其聞道也,

遠矣,猶且從師而問焉。今之眾人,其下聖人也亦遠矣,而 故聖益聖,愚益愚。聖人之所以為聖,愚人之所以為愚,其皆出於此乎? 嗟乎!師道之不傳也久矣,欲人之無惑也難矣!古之聖人,其出人也 恥學 於師。是

之書而習其句讀者 愛其子,擇師而教之,於其身也,則恥師焉,惑矣!彼童子之師,授 ,非我所謂傳其道、解其惑者也。句讀之不知 ,惑之不

解 , 或 師 焉,或不焉 ,小學而大遺,吾未見其明也。

足羞 者 君子不齒,今其智乃反不能及,其可怪也歟! , 聖 則群聚而笑之。 ,官盛 巫 人 、醫、樂師 無常師 則近諛。嗚呼!師道之不復可知矣。 , 孔子師郯子、萇弘、 、百工之人,不恥相師。士大夫之族,曰師、 問之 ,則曰:「彼與彼年相若也, 師襄 、老聃。 巫 ` 醫、 郯子之徒,其賢不及 道 相 樂師 似也 、百工之人 。」位卑則 日弟子云

於弟子。聞道有先後,術業有專攻,如是而已。 孔子。孔子曰:「三人行,則必有我師。」是故弟子不必不如師, 師不必賢

八五

李氏子蟠,年十七,好古文。六藝經傳,皆通習之。不拘於時,學於

余。余嘉其能行古道,作師說以貽之。

# 祭十二郎文 韓愈

年月日 , 季父愈, 闡 汝喪之七日 , 乃能銜哀致誠 ,使建中遠具時羞之

奠

告汝十二郎之靈:

小 與 也。吾上有三兄 ,當不復記憶;吾時雖能記憶,亦未 身,形單影隻。嫂嘗撫汝指吾而言曰:「韓氏兩世,惟此而已!」汝時猶 汝 俱 嗚呼!吾少孤 幼 , 從 嫂 歸葬 ,皆不幸早世。承先人後者,在孫惟汝,在子惟吾 ,及長,不省所怙 河 陽 0 既 又 與 汝 就 ,惟兄嫂是依。中年 知其言之悲也。 食江 南 , 零 丁 孤苦 , ,未嘗 兄 殁南方 \_ 。 兩 日 , 吾 相 世 離

墓 , 遇汝 吾年十九 從嫂喪來葬 ,始來京城 。又二年,吾佐董丞相 。其後 四年 ,而歸視汝。又 於汴州 , 四年 汝來省吾;止 , 吾 往 河陽省墳 一歲

者存 耿蘭之報,何為而在吾側也?嗚呼!其信然矣!吾兄之盛德而夭其嗣矣! 歿 信 吾 而 升斗之禄。誠 吾 以 使 久 ,長者衰者而存全乎?未可以為信也。夢也,傳之非其真也,東野 也 不可去,汝不肯來,恐旦暮死,而汝抱無涯之戚也。」 與 取 齒牙動搖。念諸父與諸兄,皆康彊而早世。如吾之衰者,其能久存乎! 去年 。圖 , 汝 汝者始行,吾又罷去,汝又不果來。吾念汝從於東,東亦客也,不可 , 吾兄之盛德而天其嗣乎?汝之純明 彊 俱 久遠者,莫如西歸,將成家而致 少年, 者 ,孟東野往,吾書與汝曰:「吾年未四十, 天 而 知其如此,雖萬乘之公相,吾不以一日輟汝而就也! 以為 病者全乎!嗚呼!其信然邪?其夢邪?其傳之非其真邪? 雖 暫相 别 ,終當久與相 汝。嗚呼!孰謂汝遽去吾 而不克蒙其澤乎?少者疆者而天 處 , 故 捨汝 而視茫茫,而 而 旅食京 孰謂少者歿而長 而 師 髮蒼蒼 歿 之書 乎! 以求

八七

請

歸

取

其孥。明年,丞相薨,吾去汴州,汝不果來。是年,吾佐

戎徐

州

之子始 立 死 而 矣!所謂 邪!嗚呼哀哉 也 為 ! 白 十 矣 死 理者不可推,而壽者不可知矣!雖 歲,吾之子始五歲;少而彊者不可保, 而 , 動 有 搖者 知 ! , 其 或 幾 脫 何 而落矣;毛 離 ; 其 無 知 血 , 日益衰,志氣 悲 不 ·幾時 然 ,我自今年來 如 , 此孩提者 而 日 益 不悲者 微 , 幾 , 又 無 ,蒼蒼者或 窮 何 不 可冀其成 期 從 矣 汝 ! 汝 而 化

野 常常有之。」 斯 日 與 乎?汝 吾書 蓋 汝去年書云:「比得軟 東 之書 , 野 乃問 Ż 使者 未始以為憂也。嗚呼!其竟以 ,六月十七日也 使者,使者妄稱 , 不 知 問 腳 家 病,往 人 。東野云: 以應 以 月 往 之耳。其然乎?其不然乎? 日; 1.而劇 汝 如 。」吾曰:「是病也,江 耿 歿 此 蘭 而殞其生乎!抑 以 之 六 報 月二日 , 不 知 0 當言 耿 蘭 別有 月日 之 報 疾 之人, 無月 而致 東

南

汝

之純

明

宜業其家者,而不克蒙其澤矣

0

所

謂

天者誠難

測

,而

神

者

誠

難

明

窆不 時 相 喪 則 吾夢相 守 , 待終喪而 0 汝 吾力 以 臨 今吾 死。一 其穴 殁吾 接 使建中祭汝 能 。吾實為之,其又何尤!彼蒼者天,曷其有極 取以 0 不知日;生不能相養以共居,歿 改 在天之涯,一在地之角,生而 吾行負神 葬 來;如 ,終葬汝於先人之兆 ,弔 不能 明,而 汝 守以終喪 之孤,與汝之乳母。彼有食,可守 使汝夭;不孝不慈,而 則 , 然後惟其所 遂 不能 影不與吾形相依 取 以來。其餘 撫 汝 願 以盡哀;斂不憑其 不得與汝 。嗚呼!汝 ! 奴 , 死 婢 相 ,並令守汝 以 待終喪 而魂不與 養 病吾不知 以 生 棺

言有窮而情不可終, 餘年,教吾子與汝子,幸其長;成吾女與汝女,待其嫁 自今已往,吾其無意於人世矣。當求數頃之田,於伊、潁 汝其知也邪?其不知也邪?嗚呼哀哉!尚饗! , 如 此 而 ر و 之上,以待 嗚呼!

#### 宋文

# 嚴先生祠堂記 范仲淹

聖人 時 , 之清。泥塗軒冕,天下孰加焉?惟光武以禮下之 臣 先生,漢光武之故 妾 億 兆 , 天 下 孰 加馬? 人也 , 惟先 相 尚 生 以道 以 節 。及帝握赤符 高 之 0 既 而 動 , 乘 星象 六龍 , 歸 ,得 工 湖 聖人之 , 得

之大; 生 在 之 屯 Ü 之初九,陽德方亨,而 在 微 蠱 ,出乎 光武 之 上 九 ,豈能 日月之上;光武之器,包乎天地 , 眾 遂先生之高哉?而使貪夫廉 方 有 為 能 , 而  $\neg$ 獨 以貴下賤 「不事王 ,大得民 侯 之外。微先 ,高 ,懦夫立 也。」 尚 其 事 光武 , 是 生 ° , 不 大 先 以 之。蓋 有功於名 能 生 成 以 光武 之 先

仲 淹來守是邦 , 始構堂而奠焉 0 **迺復其為後者四家** , 以 奉 祠事 又 從

教

也

而 歌曰:「雲山蒼蒼,江 水泱泱。先生之風 ,山高 水長。」

### 岳陽樓 記 范仲淹

重 修岳陽 慶曆 樓 四 年春 , 增其舊制 1, 滕子 京謫守巴陵郡 , 刻唐賢今人詩賦 0 越 於其上;屬予作文 明 年 , 政 通 人 和 , 以 百 記 廢 之 具 興 乃

通 涯 巫 峽 朝 予 , 觀 睴 南極瀟湘,遷客騷人,多會於此,覽物之情,得無異乎? 夕陰 夫巴陵勝 , 氣象萬 狀 , 在 千 0 洞 此 庭 \_ 則岳陽 湖 0 樓 銜 遠 之 大觀也,前 山 ,吞長 江 人之 , 浩浩湯湯 述 備 矣 , 横 然 無 則 北 際

形; 商旅 若 夫 不行 霪 雨 , 霏霏 檣 傾 楫摧;薄暮冥冥,虎嘯猿啼 連 月 不 開 陰 風 怒號 濁 浪 排 0 登斯樓也, 空; 日 星隱 則 耀 有去 山 國 됴 懷 潛

,

,

鄉 憂讒 至若 畏譏 春和景明,波瀾不驚;上下天光,一 滿 目蕭然 , 感 極 而悲者矣! 碧萬頃;沙鷗翔集, 錦

鱗游 九

泳;岸芷汀蘭 ,郁郁青青。而 或長煙一空,皓月千里;浮光躍金,靜影沉 酒臨

壁;漁歌互答,此樂何極!登斯樓也,則有心曠神怡,寵辱皆忘,把

風 ,其喜洋洋者矣!

悲 。居廟堂之高 嗟夫!予嘗求古仁人之心,或異二者之為,何哉?不以物喜,不以己 ,則憂其民;處江湖之遠,則憂其君。是進亦憂,退亦憂

微斯人 然 則 何 時 ,吾誰與歸?· 而 樂耶?其必曰:「先天下之憂而憂,後天下之樂而樂乎!」噫!

時 六年九月十五 日

#### 義 田 記 錢公輔

方貴顯時 范文 , 置負郭常稔之田千畝,號 正公,蘇人也。平生好施與,擇其親而貧、疏而賢者 日義 田 , 以 養濟群族 之人 , 咸 0 日 有食 施之。

娶者十五 歲 百 而 人一升,歲衣人一鎌,嫁女者五十千,再嫁者三十千,娶婦者三十千 居官者罷莫給 有衣 斛 以 ,嫁娶 其所 千,葬者 入 凶葬皆有贍。擇族之長而賢者主其計,而時其出 0 , 給其 此其大較也 如再嫁之數 所 聚 ,沛然有餘 ,幼者十千。族之聚者九十口 而 無窮 0 仕 而家居俟代者與焉;仕 , 歲 納焉 入給 日 稻八 , 再 食

子 其志,如公之存也。公既位充禄厚,而貧終其身。歿之日,身無以為斂, 及參大政,於是始有祿賜之入,而終其志。公既歿,後世子孫修其業 無以 初 為喪。 ,公之未貴顯也,嘗有志於是矣,而 惟以 施貧活族之義遺其子而已 力未逮者三十年。 既 而 為 西 , 承 帥

父之族 昔晏平仲敝車羸馬,桓子曰:「是隱君之賜也。」晏子曰:「自臣之貴, ,無不乘車者;母之族 ,無不足於衣食者;妻之族,無凍餒者;齊

及其疏遠之賢。孟子曰:「親親而仁民,仁民而愛物。」晏子為近之。觀文 也。又愛晏子之仁有等級,而言有次也;先父族,次母族,次妻族,而 於是齊侯以晏子之觴而觴桓子。予當愛晏子好仁,齊侯知賢,而桓子服義 國之士,待臣而舉火者,三百餘人。以此而為隱君之賜乎?彰君之賜乎?」 後

正之義,賢於平仲,其規模遠舉,又疑過之。

溝中齊者,豈少哉?況於他人乎?是皆公之罪人也。 其下為卿、大夫、為士,廪稍之充,奉養之厚,止乎一己;族之人瓢囊為 妻孥之富,止乎一己;而族之人,不得其門而入者,豈少哉?況於施賢乎! 嗚呼!世之都三公位,享萬鍾禄,其邸第之雄,車輿之飾,聲色之多,

可略也。獨高其義,因以遺於世云。 公之忠義滿朝廷,事業滿邊隅,功名滿天下。後必有史官書之者,予

九四

# 才德論 資治通鑑

才勝 愛者易親,嚴者易疏,是以察者多蔽於才而遺於德。自古昔以來,國之亂 暴,是虎而翼者也,其為害豈不多哉!夫德者人之所嚴,而 善 力 能 括 德之資也;德者,才之帥也。雲夢之竹,天下之勁也,然 謂之賢,此其所以失人也。夫聰察強毅 不若得愚人。何則?君子挾才以為善,小人挾才以為惡。挾才以為善者, 不能 無不至矣;挾才以為惡者,惡亦無不至矣。愚者雖欲為不善,智不能 以擊強。是故才德全盡謂之聖人,才德兼亡謂之愚人,德勝才謂之君子 , 則不能 德謂之小人。凡取人之術,苟不得聖人、君子而與之,與其得小人, 臣 勝 光 ,譬之乳狗搏人,人得而制之。小人智足以遂其奸,勇足以 日:智伯 以入堅;棠谿之金,天下之利也,然而不鎔範 之亡也,才勝德也。夫才與德異,而 之謂才,正直中和之謂德。才者 世俗莫 ,不砥 才者人 而不矯揉 之 能 礪 之所愛 辨 ,不羽 ,則不 決其 , 通 周

九五

九六

臣 國為家者,苟能審於才德之分而知所先後,又何失人之足患哉 ,家之敗子,才有餘而德不足,以至於顛覆者多矣,豈特智伯哉!故為

### 訓儉示康 司馬光

華 干名,但順吾性而已。 不可違也。」乃簪一花。平生衣取蔽寒,食取充腹;亦不敢服垢弊以繑俗 美之服, 吾本寒家,世以清白相承。吾性不喜華靡,自為乳兒,長者加以金銀 輒羞赧棄去之。二十恭科名,聞喜宴獨不戴花。同年曰:「君賜

應 之曰:孔子稱:「與其不遜也,寧固。」又曰:「以約失之者,鮮矣!」

眾人皆以奢靡為榮,吾心獨以儉素為美。人皆嗤吾固陋,吾不以

為病。

又曰:「士志於道,而 取惡衣惡食者,未足與議也。」古人以儉為美德,今

人乃以儉相詬病。嘻,異哉!

營聚 矣!嗟乎!風俗頹敝如是,居位者雖不能禁,忍助之乎! 夫家皆然 法 於梨 牧 , 判官,客至未嘗不置 近歲 果 然 、栗、棗、柿之類;肴止於脯 後敢 , 人 風俗尤為侈靡 、肴非遠方珍異 發書 不相非也。會數 。苔或 ,走卒類士服 不然 酒,或三行 ,食非多品 ,人爭非 而 禮勤 , 、醢、菜羹,器用瓷 , 、五行,多 ,農夫躡絲履 器 **Ž** 物薄而情厚 Ш 非滿 以為鄙 不過 案 ,不敢 。近日士大夫家 。吾記天聖中 吝。故不隨俗靡者蓋 七行 會賓友;常 、漆。當時士大 0 酒 酤 於 市, 先公為 酒 數 鮮 果 月 非

內

止

群

寬矣。」參政魯公為諫官,真宗遣使急召之,得於 以 實對 上曰:「卿為清望官, 奈何飲於酒肆?」 對 酒 家。 日 : 臣家貧 既 入,問 其所來, 客 至無

器

Ш

、肴

、果,故就酒家觴之。」上以無隱

,益重之。張文節為相

,自奉

九 七 太

隘

又

聞昔李文靖公為相,治居第於封丘門內,

廳事前僅容旋馬

或言其

,公笑曰:「居第當傳子孫,此為宰相廳事誠隘,為太祝、奉禮廳事已

儉 , 雖 今日之俸豈能常有?身豈能常存?一旦異於今日,家人習奢已久,不能頓 自 信 舉家錦衣玉食,何患不能?顧人之常情,由儉入奢易,由奢入儉難。吾 必 ·清約,外人頗有公孫布被之譏。公宜少從眾。」公嘆曰:「吾今日之俸, 致 失所。豈若吾居位、去位 、身存、身亡,常如一日乎?」嗚呼!

**大賢之深謀遠慮,豈庸人所及哉!** 

養

;如為河陽掌書記時,所親或規之曰:「公今受俸不少,而自奉若此。公雖

九八

則 則 儉來也。夫儉則寡欲:君子寡欲,則不役於物,可以直道而行;小人寡欲 貪慕富貴,枉道速禍;小人多欲,則多求妄用,敗家喪身。是以居官必 能謹身節用,遠罪豐家。故曰:「儉,德之共也。」侈則多欲:君子多欲, 禦孫 曰:「儉,德之共也;侈,惡之大也。」共,同也;言有德者皆由

賄

,居鄉必盗

|。故曰:「侈,惡之大也。」

衣帛, 冠一 錢 公叔文子享衛靈公,史鰌知其及禍;及戍,果以富得罪出亡。何曾日食萬 , 時 至 昔正考父饘粥以 馬 ', 然 孫 以驕 不食粟,君子以為忠。管仲鏤簋朱紘、山楶藻稅,孔子鄙其 以 溢傾家。石崇以奢靡誇人,卒以此死東市。近世寇萊公豪侈 功業大,人莫之非,子孫習其家風,今多窮困 餬口 ,孟僖子知其後必有達人。季文子相三君,妾不 小器。

徒身當服行, 其餘 以 儉立名 當以 訓汝子孫,使知前輩之風俗云。 ,以侈自敗者多矣!不可 遍 數 , 聊舉數人以 訓汝。 汝非

## 朋黨論 歐陽修

臣 聞 朋黨之說,自古有之,惟幸人君辨其君子小人而已。

裡 也。然臣謂小人無朋,惟君子則有之,其故何哉?小人所好者,祿利也; 大 凡君子與君子,以同道為朋;小人與小人,以 同利為朋: 此自然之

オオ 九九九

爭先,或 惜 人 所貪者, 無 者名節 0 此君子之朋也。故為人君者,但當退小人之偽 朋 , 其暫為朋者 利盡而交疏 財貨也。當其同利之時,暫相黨引以為朋者,偽也。及其見利而 0 以 之修身 則 , , 偽 則 同道 也。君子則不然;所守者道義 反相賊害,雖其兄弟親戚,不能 而 相 益 ; 以 之事 國 , 則 朋,用君子之真朋 同 ら い ,所行者 相保 而 共 濟 0 忠信 故臣謂小 , 終 始 , 所 則 如

天子 舜佐堯,退四凶小人之朋,而進元 愷君子之朋,堯之天下大治。及舜自為 二十二人為一 ,而 堯 之時,小人共工、驩兜等四人為一朋;君子八元 八愷十六人為一 皋 • 朋 夔 ` 而舜皆用之,天下亦大治 稷 、契等二十二人竝列 於 朝 , 更相稱美 ,更相 推讓 , 凡 朋。

天下治矣

書曰:「紂有臣億萬,惟億萬心;周有臣三千,惟一 心。」紂之時,億

,

0

萬 人各異心,可謂不為朋矣,然紂以亡國。周武王之臣,三千人為一大朋,

而 周 用 以 興

亂

後方悔悟,盡解黨人而釋之,然已無救矣。

後 漢 獻帝時,盡取 天下名士囚禁之,目為黨人。及黃巾賊起,漢室大

唐之晚年,漸起朋黨之論。及昭宗時,盡殺朝之名士,或投之黃河,

漢 曰:「此輩清流,可投濁流。」而唐遂亡矣 獻帝;能誅戮清流之朋,莫如唐昭宗之世:然皆亂亡其國 夫前 世之主,能使人人異心不為朋,莫 如紂;能禁絕善人為朋,莫

如

更 相 稱 美推讓而不自 疑,莫如舜之二十二臣。舜亦不疑而 皆 用 之 , 然

而 也。 後 世不 周武之世,舉其國之臣三千人,共為一朋。自古為朋之多且大,莫 · 胡舜為二十二人朋黨所欺,而稱舜為聰明之聖者 , 以 辨 君 子 與小

如周。然周用此以興者,善人雖多而不厭也。

夫興亡治亂之迹,為人君者可以鑒矣。

## 瀧岡阡表 歐陽修

嗚呼!惟我皇考崇公,卜吉於瀧岡之六十年,其子脩始克表於其阡。

非敢緩也,蓋有待也。

不 於 軄 祿 教 能 汝 之 雖 ,俾至於成人。太夫人告之曰:「汝父為吏廉,而 知汝 也。 植 薄 脩 不幸 自吾為汝家婦,不及事吾姑;然知 之必有立;然 常 以 庇 不 , 使 而為生;吾何恃而能自守邪?吾於汝父,知其 生四歲而 有餘 0 日:『 知汝父之必將有後也。吾之始歸也, 孤。太夫人守節自誓;居窮,自力於衣食,以長以 毋以是為我累 0 汝父之能養也。汝 故其亡也, 好 施 與,喜賓客;其俸 無 汝父 一 二 , 一瓦 孤 免於 而 之覆 幼 以 ;母喪 有待 吾

有恨 於中 於旁 也 免 則 之!夫養不必豐,要於孝;利雖不得博於物, 也。其施於外事,吾不能知;其居于家,無所矜飾, 不得,則死者與我皆無恨也;矧求而有得邪?以其有得,則知不求而死者 日 以 方逾年, 此 於 又 也。 者 後當 知 喪適然耳。既而其後常然,至其終身,未嘗不然。吾雖 涕泣曰:『昔常不足,而今有餘,其何及也!』吾始一二見之,以 此 因 汝父之能養也 邪 死獄也, 夫常求其生,猶失之死,而世常求其死也!』 歲時祭祀,則必涕泣曰:『祭而豐,不如養之薄也!』 指 以 !嗚呼 而嘆曰:『 我語告之。』其平居教他子弟 !其心厚於仁者邪!此吾知 我求其生不得爾 。汝父為吏,嘗夜燭治官書, 術者謂我歲行在戍將死, 0 吾曰:『生可求乎?』曰:『 ,常用 汝父之必將 要其心之厚於仁。吾不能教 | 使其言然,吾不 此 屢廢 語,吾 而所為如此 回顧 而 有後 嘆 耳 熟焉 乳者 不 0 也 吾 及事 間御 及見兒 求 問 ,是真發 劍 , 汝 其 故 汝 之 姑 酒食, 其 為新 能詳 之立 生 而 , 勉 一而 則 而 立

汝,此汝父之志也。」脩泣而志之,不敢忘。

康、彭城三郡太君。自其家少微時,治其家以儉約,其後常不使過之。 自若,曰:「汝家故貧賤也,吾處之有素矣。汝能安之,吾亦安矣。」 世為江南名族。太夫人恭儉仁愛而有禮;初封福昌縣太君,進封樂安、安 又為泰州判官。享年五十有九,葬沙溪之瀧岡。太夫人姓鄭氏,考諱德儀, 「吾兒不能苟合於世,儉薄所以居患難也。」其後脩貶夷陵,太夫人言笑 先公少孤力學,咸平三年進士及第。 為道州判官,泗 、綿二州推官;

又七年而罷。自登二府,天子推恩,褒其三世;故自嘉祐以來,逢國大慶, 以 封 其親。又十年,脩為龍圖閣直學士、尚書吏部郎中,留守南京,太夫人 疾終于官舍,享年七十有二。又八年,脩以非才入副樞密,遂參政事, 自先公之亡二十年,脩始得禄而養。又十有二年,列官于朝 , 始 得贈

楚國 累封吳國太夫人。皇考崇公,累贈金紫光祿大夫、太師、中書令兼尚書令; 皇 必 工妣累封 加 太夫人。皇祖府君累贈金紫光祿大夫、太師、中書令兼尚書令;祖 竉 錫。皇曾祖府君,累贈金紫光祿大夫、太師、中書令;曾祖 越國太夫人。今上初郊,皇考賜爵為崇國公,太夫人進號魏 妣累封 國 妣

者 其先者, 譜 大 唯 , 我 , , 礼祖考 並揭 具刻于碑,既又載我皇考崇公之遺訓 實有三 於是小子脩泣而言曰:「嗚呼!為善無不報,而遲速有時,此理 其來 於阡 , 朝 積善成德 ·有自 0 之錫命,是足以表見於後世, 俾 知 夫小子脩之德薄能鮮 , 宜享其隆 , 雖 不克有於其躬 , ,太夫人之所以教 遭時竊 而 庇 賴其子孫矣 位, , 而 而幸全大節 賜爵受 ,而 。 \_\_\_ 封 乃列 有待於脩 , 之常也。 ,不辱 顯 其世 、榮褒

熙寧三年,歲次庚戌、四月辛酉朔十有五日乙亥,男推誠保德崇仁 翊

戴 充京東東路安撫使、上柱國、樂安郡開國公、食邑四千三百戶,食實封一 功臣 、觀文殿學士、特進行兵部尚書、知青州軍州事、兼管內勸農使、

千二百戶脩表

### 留侯論 蘇軾

無故 拔 劍 加之而 而起,挺身而鬬,此不足為勇也。天下有大勇者,卒然臨之而不驚 古之所謂豪傑之士者,必有過人之節。人情有所不能忍者,匹夫見辱, 不怒,此其所挾持者甚大,而其志甚遠也。

子者出而試之?觀其所以微見其意者 以為鬼物 ,亦已過矣。且其意不在書 ,皆聖賢相與警戒之義;而世不察

夫子房受書於圯上之老人也,其事甚怪;然亦安知其非秦之世有隱君

當韓之亡,秦之方盛也,以刀鋸鼎鑊待天下之士。其平居無罪夷滅者

房之 者也。是故倨傲鮮腆而深折之。彼其能有所忍也,然後可以就大事,故曰: 謀 其 可乘。子房不忍忿忿之心,以匹夫之力,而逞於一擊之間。當此 不 身 可勝數。雖有賁、育,無所復施。夫持法太急者,其鋒不可犯,而其末 , 不死 而 之 可愛 特 出 者,其間不能容髮,蓋亦已危矣。千金之子,不死 於 , 荊軻、聶政之計,以僥倖於不死,此固 而 盗賊 之不足 以 死也。子房 以蓋世之材,不為伊 圯上之老人所為深惜 於 盗 尹 賊 之時 ` 0 太 何者? 公之 , 子

而 有 民 憂其度量之不足,故深折其少年剛銳 報 矣 人之志,而 楚莊 遂舍之。 王伐鄭,鄭伯肉袒牽羊以逆。莊王曰:「其君能下人,必能信用其 不能下人者,是匹夫之剛也。夫老人者,以 句踐 之困於會稽, 而歸臣妾於吳者,三年而 之氣,使之忍小忿而 就 為子房才 大謀。 不倦 何 。且夫 有 則 餘

孺子可教也」。

非

有平生之素,卒然相遇於草野之間,而命以僕妾之役,油

然而不怪者,一〇七

此固秦皇之所不能驚,而項籍之所不能怒也。

項籍 唯不能忍,是以百戰百 觀 夫高 袓 之所 以 勝 **%** 而 「勝而 項籍之所 輕用其鋒;高祖忍之,養其全鋒而 以敗者,在能忍與不能忍之間 待 而 其弊 已矣

此子房教之也。當淮陰破齊而欲自王,高祖發怒,見於詞色。由

此

觀

之,

猶有剛強不忍之氣,非子房其誰全之?

太 史公疑子房以為魁梧奇偉,而其狀貌乃如婦人女子,不稱其志氣。

嗚呼!此其所以為子房歟!

### 前赤壁賦 蘇軾

不 徊於斗牛之間 興。舉酒屬客 壬 戍之秋,七月既望,蘇子與客泛舟游於赤壁之下。清風 0 白露橫 , 誦 明月之詩,歌窈窕之章。少焉 江 ,水光接天 0 縱一葦之所如,凌萬頃 , 月出於東 徐來 之茫然 山 之上 ,水波 , 徘 浩

浩乎如馮虛御風,而不知其所止;飄飄乎如遺世獨立,羽化而登 仙

然 : 渺 渺兮予懷,望美人兮天一方。」客有吹洞蕭者 如怨 於 是 飲酒 如慕 樂甚 ,如泣如訴;餘音嫋嫋 , 扣 舷 而 歌之。 歌 曰:「桂棹兮蘭漿 ,不絕如縷。舞幽壑之潛蛟,泣孤舟 ,倚歌 , 而和之,其聲 擊空 明兮泝 流 嗚嗚 光

之嫠婦

千里 蒼; 烏 吾與子 鵲 , 此 南 蘇子愀然,正襟危坐,而問客曰:「何為其然也?」客曰:「『月明星稀 **'**,漁樵 旌 飛 非 汽, 此 孟 旗 絞蔽 德 於 空 之困 非曹孟德之詩乎?西望夏口 江渚 , 釃 於 之上,侶魚蝦而友麋鹿;駕一葉之扁舟 周郎者乎?方其破荊 酒 臨 江 ,横槊 賦詩,固一 州 ,東望武昌 ,下江 世之雄也,而 陵 , , 山 順流 川相 今安在哉?況 而 ,舉匏樽以 東 繆,鬱乎蒼 也 , 舳 相 艫

屬;寄蜉

蝣於天地

, 渺

滄海之一栗

。哀吾生之須臾,羨長江之無窮;挾

飛

仙 以遨遊,抱明月而長終;知不可乎驟得,託遺響於悲風。」

聲 非 而 而卒莫消長也。蓋將自其變者而觀之,則天地曾不能以一瞬;自其不變者 吾之所 觀 , 蘇子 之,則物與我皆無盡也。而又何羨乎?且夫天地之間,物各有主 目 遇 有, 曰:「客亦知夫水與月乎?逝者 之 而 雖 成色。 一毫 一而莫取 取之無禁 0 惟江 , 用 上之清風 之不竭 如斯, 。是造物者之無盡藏 ,與山間 而 未嘗往也;盈虚者 之明月 ,耳得之 也, 而 如 吾與 而 。苔 彼 為

客喜 而 笑 , 洗盛更酌,肴核既盡 , 杯盤狼藉。 相與枕藉乎舟中,不 知

子之所共食。

### 後赤壁賦 蘇軾

東方之既

白

是歲十月之望 ,步自雪堂 ,將歸于臨皋,二客從予, 過黃泥之坂 。霜

壁之下。 曰:「我有斗酒,藏之久矣, 曰:「有客無酒, 既降, 網得魚,巨口 江 流 有聲 木葉盡脫,人影在地,仰見明月 , 斷岸千尺;山高月小 細鱗 有酒無肴;月白風清,如此良夜何?」客曰:「今者薄暮, ,狀似 松江之鱸 以待子不時之須!」於是攜酒 , 。顧安所得酒乎?」歸而 水落 顧 石 出 而樂之, 0 曾日月 行歌相答。已而 與魚 之幾 何 謀 , 復游 諸 , 婦 而 於 江 , 婦 赤 嘆

舉

露

,

不可 之危巢,俯馮夷之幽宮;蓋二客不能從馬 劃然 復識矣!予 長嘯,草木震動,山鳴 乃攝衣而上,履巉巖 谷應 ,風 ,披蒙茸,踞 起水湧。 予 虎豹,登虬龍 亦 悄 然而 悲 , 攀 肅然而 栖 鵝

山

恐 ,凜乎其不可留也!反而登舟,放乎中流,聽其所止而休焉

時夜將半, 四顧寂寥。適有孤鶴,橫江東來,翅如車輪,元裳縞衣

戛然長鳴,掠予舟而西也。須臾客去,予亦就睡。

問其姓名,俛而不答。「嗚呼噫嘻!我知之矣,疇昔之夜,飛鳴而過我者, 一道士,羽衣翩躚,過臨皋之下,揖予而言曰:「赤壁之遊,樂乎?」

非子也耶?」道士顧笑,予亦驚悟。開戶視之,不見其處。

#### 三槐堂銘 蘇軾

天可

者將安取衷哉?吾聞之申包胥曰:「人眾者勝天,天定亦能勝人。」世之論 天者,皆不待其定而求之,故以天為茫茫。善者以怠,惡者以肆。盗

必乎?賢者不必貴,仁者不必壽;天不可必乎?仁者

必有後。二

壽,孔、顏之厄,此皆天之未定者也。松柏生於山林,其始也, 厄於牛羊 0 而其終也,貫四時,閱千歲而不改者,其天定也。善惡之報, 困於蓬蒿 蹠之

至於子孫,則其定也久矣。吾以所見所聞所傳考之,而其可必也,審矣。

國 之將興,必有世德之臣,厚施而不食其報;然後其子孫能與守文太

太宗 平 槐 於 之主,共天下之福。故兵部侍郎晉國 王公,顯於漢、周之際,歷事太 庭 。文武忠孝,天下望以為相;而公卒以直道,不容於時。蓋嘗手植三 ,曰:「吾子孫必有為三公者。」已而,其子魏 國 文正 公 , 相 真宗

以 晉 公比 李栖 筠者 ,其雄才直氣 ,真不相 上下。 而 栖筠 之子吉甫 , 其 孫 德 帥

三

十餘

年。

位

不滿其德。天

將復興王氏

也數?何其子孫之多賢也。

世有

吾

不及見魏公,而見其子懿敏公,以直諫事仁宗皇帝,出入侍從,將

天,

取

必

八年。今夫寓物於人,明日而取之,有得有否。而晉公修德於身,責報於

於數十年之後,如持左券,交手相付,吾是以知天之果可必也。

於景德、祥符之間朝廷清明、天下無事之時,享其福

禄榮名者,十有

皇帝

氏之福 裕 功 ,蓋未艾也。懿敏公之子鞏,與吾遊。好德而文,以世其家。吾以一一三 名富貴,略與 王氏等; 而忠信 仁厚,不及魏 公父子。 由 此 觀 之 , 王

是銘之。銘曰:

四方 砥平。 嗚 呼休哉!魏公之業,與槐 歸視其家,槐陰滿庭。吾儕小人,朝不及夕。相時 俱萌。封植之勤,必世乃成。既 射利,皇卹 相 真宗

厥德。庶幾僥倖,不種而穫。不有君子,其何能國?王城之東,晉公所廬

鬱鬱三槐,惟德之符。嗚呼休哉!」

# 上樞密韓太尉書 蘇轍

學 而 能 太尉執事:轍生好為文,思之至深,以為文者氣之所形。然 ,氣可以養而致。孟子曰:「我善養吾浩然之氣。」今觀其文章,寬 文不可以

學為如此之文哉?其氣充乎其中,而溢乎其貌,動乎其言,而見乎其文, 汌 厚宏博 與燕 充乎天地之間 ` 趙間豪俊 交 游 ,稱其氣之小大。太史公行天下,問覽四 0 故 其文疎荡 , 頗 有奇氣 。此二子者,豈嘗執筆 海 名山大

而不自知也。

奔流 數 觀其容貌之秀偉,與其門人賢士大夫遊,而後知天下之文章聚乎此也。 以 池苑囿之富且大也,而後知天下之巨麗。見翰林歐陽公,聽其議論之宏辯, 人之陳述,不足以激發其志氣。恐遂汩沒,故決然捨去,求天下奇聞 知 百 天 里之間,無高 , 轍 地 生 慨 十有九年矣,其居家所與游者 之廣大。過秦、漢之故都,恣觀終南、嵩、華 然想見古之豪傑。至京 山大野可登覽以自廣。 師 , 仰觀天子宮闕之壯 ,不過其鄰里鄉黨 百氏之書,雖無所不讀,然皆古 ,與倉廩 之高;北 之人。所 顧黃河之 府 庫 見不過 壯觀 城城

周 大,雖多而 公、召公,出 何為?轍之來也,於山見終南 列方 叔、召虎,而轍 也未之見焉。且夫人之學也,不志其 、嵩、華之高,於水見黃河之大

太

尉

以

才略冠天下,天下之所恃以無憂,四

夷之所憚

以不敢

發。入則

言 且 以 深 自 ,於人見歐陽公,而 壯 ,然後可以 盡天下之大觀而無憾者矣 猶 以 為未 見太尉也!故願得觀賢人之光耀,聞一

其 所 樂。然幸得賜歸待選,使得優游數年之間,將歸益治其文,且 轍 年少,未 能 通習 吏事。 嚮 之來, 非有取於升斗之禄,偶然得之,非 一學為 政

太尉苟以為可教而辱教之,又幸矣

# 黃州快哉亭記 蘇轍

勢益 即 其廬之 張 江 。至 出 西 西 南 於赤壁之下,波流浸灌,與海 陵,始得平 為亭 , 以覽觀江 地。其流奔放肆大,南合沅、 流之勝 。而 余兄子瞻,名之曰「快哉」。 相若。清河 湘,北合漢 張 君夢得謫居齊安 、沔,其

出 沒 於其前 蓋 亭之 所 , 見 夜 則魚龍悲嘯於 , 南 北 百 里 , 公其下 東 西 0 一舍 變化 」。濤瀾 倏忽, 洶湧 動 ,風 心 駭 雲開 目 , 闔 不 可 0 晝 久 視 則 舟楫 。 今

消 濱 乃 得 , 日 故 出 翫 城 之几席 ,漁夫 之墟 樵父之舍,皆可指數 之上 , 曹孟 , 舉 德 目 ` 孫 而 仲謀 足 0 之所睥睨 西 望 ,此其 武昌 之所 諸 , 周 山 以 瑜 , 為快哉者也 岡 、陸遜 陵 起伏 之所騁鶩 , 草 。 至 木 行列 於長洲之 0 其流風 0 煙

遺

跡

,

亦

足

以

稱快

世俗

昔楚襄王從

宋玉、景差於蘭臺之宮,有風

颯然至者。王披襟當之,

日

安得 楚 王 快 共 哉 之所以為樂 此 之 ! 玉 風 ! 寡 ,與庶人之所以為憂,此則人之變也,而風何與焉? 之言, 人 所 與 蓋 庶 人共者耶?」宋玉 有 誳 焉 0 夫 風 無 雌 曰:「此獨 雄 之異 , 而 大王之雄 人有遇 不遇之變 風 耳 , 庶人

其 將 中 何 適 宜 士 有 而 生 以過 非快?今張君不以謫為患,竊會計之餘功,而自放 於 世, 人者 使其中不自得, 0 將蓬戶甕牖 將 , 何 無所不快;而 往 而 非病?使其中 況 乎濯長江 坦然, . 之清流 山 不以 水 之間 物 傷 , 揖 , 此 性 西 ,

以清風 山之白雲,窮耳目之勝,以自適也哉?不然,連山絕壑,長林古木,振之 , 照之以明月,此皆騷人、思士之所以悲傷憔悴而不能勝者,烏睹

明 文

其為快也哉?

### 賣柑者言 劉基

將 賈十倍,人爭鬻之。予貿得其一,剖之,如有煙撲口鼻。視其中,則乾若 敗絮。予怪而問之曰:「若所市於人者,將以實籩豆,奉祭祀、供賓客乎? 街外以惑愚瞽也?甚矣哉!為欺也。」 杭有賣果者,善藏柑,涉寒暑不潰,出之煜然,玉質而金色。置于市,

有言。而獨不足於子乎!世之為欺者不寡矣,而獨我也乎?吾子未之思也! 賣者笑曰:「吾業是有年矣,吾賴是以食吾軀。吾售之,人取之,未嘗

民 冠、拖長紳者,昂昂乎廟堂之器也,果能建伊、皋之業耶?盜起而不 今夫佩虎符、坐皋比者,洸洸乎干城之具也,果能授孫、吳之略耶?峨大 困 而 不 知 救 ,吏姦而不知禁,法斁而不知理 ,坐糜廩粟 而 不 知 恥 知 觀其 御

坐高 又 何 往 堂 而 、騎 不金玉其外、敗絮其中也哉!今子是之不察,而 大馬 、醉醇 醲 而 飫 肥 解者 孰 不巍巍乎可畏 ,赫赫乎可象也? 以 察吾柑。」予

於柑以諷耶?

默

然

無

以

應。退而思其言,類東方生滑稽之流。豈其憤世疾邪者耶?而託

# 尊經閣記 王守仁

之 心。心也,性也,命也,一也。 經 常道也。其在於天,謂之命;其賦於人,謂之性;其主於身,

謂

通 人 物, 達四海,塞天地,亙古今,無有乎弗具,無有乎弗同,

乎或變者也,是常道也。其應乎感也,則為惻隱、為羞惡、為辭讓、為是一二〇 為朋友之信。是惻隱也、羞惡也、辭讓也、是非也;是親也、義也、序也、 非;其見於事也,則為父子之親、為君臣之義、為夫婦之別、為長幼之序、

別也、信也,一也。皆所謂心也,性也,命也。

邪正之辯也,一也;皆所謂心也,性也,命也。 言其條理節文之著焉,則謂之《禮》,以言其欣喜和平之生焉,則謂之《樂》; 乎或變者也,是常道也。以言其陰陽消息之行焉,則謂之《易》;以言其紀 以言其誠 綱政事之施焉,則謂之《書》;以言其歌詠性情之發焉,則謂之《詩》;以 通人物,達四海,塞天地,亙古今,無有乎弗具,無有乎弗同,無有 偽邪正之辯焉,則謂之《春秋》。是陰陽消息之行也,以至於誠偽

通人物,達四海,塞天地,亙古今,無有乎弗具,無有乎弗同,無有

尊 乎或變者也,夫是之謂六經。六經者非他,吾心之常道也。故《易》也者 綱 志吾心之欣喜和平者也;《春秋》也者,志吾心之誠偽邪正者也。君子之於 志吾心之歌詠性情者也;《禮》也者,志吾心之條理節文者也;《樂》 志吾心之陰陽消息者也;《書》也者,志吾心之紀綱政事者也;《詩》也者, 六經也,求之吾心之陰陽消息而時行焉 政事而時施焉,所以尊《書》也;求之吾心之歌詠性情而時發焉,所以 《詩》也;求之吾心之條理節文而時著焉,所以尊《禮》也;求之吾心 , 所以尊《易》也;求之吾心之紀 也者,

產業 庫藏 之積,其子孫者或至於遺忘散失,卒困窮而 無以自全也,而 記籍

蓋昔者聖人之扶人極,憂後世,而述六經也,猶之富家者之父祖慮其

其家之所有以貽之,使之世守其產業庫藏之積而享用焉,以免於困窮之患。一二一

之欣喜

和平

而時生焉

, 所以尊「樂」也;求之吾心之誠偽邪正而時辯焉

所以尊《春秋》也。

不知 積 , 忘散失,至為窶人白夫,而猶囂囂然指其記籍曰∶「斯吾產業庫藏之積也!」 以為是 求六經之實於吾心,而徒考索於影響之間,牽制於文義之末 種種色色,具存於其家。其記籍者,特名狀數目而已。而世之學者, 六經矣 。是猶富家之子孫,不務守視享用其產業庫藏之實積 , 硜 日 一硜然 遺

故

六經者,吾心之記籍也;而六經之實,則具於吾心,猶之產業庫藏之實

是謂亂經;習訓詁 嗚 呼!六經之學,其不明於世,非一朝一夕之故矣。尚 ,傳記誦,沒溺於淺聞小見,以塗天下之耳目,是謂侮 功利 , 崇 邪 說

何以異於是?

經; 經 。若是者,是并其所謂記籍者, 侈淫 辭 , 競 詭 辩 , 飾 奸 心盗行,逐 而割裂棄毀之矣,寧復知所以為尊經也 世壟斷 , 而 猶自 以 為通 經 ,是謂賊

越城舊有稽山書院,在臥龍西岡,荒廢久矣。郡守渭南 南君大吉,既

瀛 敷 斯無邪隱矣。」閣成,請予一言,以諗多士,予既不獲辭,則為記之若是 拓書院而一新之,又為尊經之閣於其後,曰:「經正則庶民興;庶民興, 政於民,則慨然悼末學之支離,將進之以聖賢之道,於是使山陰令吳君

嗚呼!世之學者,得吾說而求諸其心焉,其亦庶乎知所以為尊經也矣。

## 訓蒙大意 王守仁

子,惟當以孝弟忠信、禮義廉恥為專務。其栽培涵養之方,則宜誘之歌詩,

古之教者,教以人倫。後世記誦詞章之習起,而先王之教亡。今教童

以 以發其志意;導之習禮,以肅其威儀;諷之讀書,以開其知覺。今人往往 歌詩習禮為不切時務,此皆末俗庸鄙之見,烏足以知古人立教之意哉!

大抵童子之情,喜嬉遊而憚拘檢,如草木之始萌芽,舒暢之則條達

譬之 洩其 志 儀 則 日 讀書者 使 也 而 生意蕭索, 跳號 時 之 已 漸 凡 雨 , **姚呼嘯於** 此皆 春風 亦 於 非 禮義而不苦其難 但 所 所 開 以 日就枯槁 , 周旋揖 霑被卉木 詠 以 其 知覺 歌, 順導其志意 矣。故凡誘之歌詩者,非但 而 讓 宣其幽 己 而 , 莫 , 入 動 , 湯其 ,調理其性情,潛消其鄙吝 抑結滯於音節 不 亦 於中和 所 萌動發 血 以 沈 脈 - 而不知 潛 越 , 反 拜 , 也。 自 復 起 其故 屈 然 而 導之習禮者, 存 伸 日 長月 發其志意而 ,是蓋先王立 其 而 固束 ら い 化; , 其筋 ,默化其廳 抑 若 揚 已 非 骸 冰 諷 教 也 霜 誦 但肅其威 ,亦所 之微意 以 剝 0 落 頑 宣 誳 其 之 以 ,

肯入 求 其 若近 聰 視 明 師 世之訓蒙稱者,日惟督以句讀課做,責其檢束,而不知導之 , 長 而 如寇仇 不 知 養 而 之 以善; 不 欲見 , 鞭 窺 撻 繩縛 避掩覆 , 若 , 待 以遂其嬉遊 拘 囚 0 彼 視學舍 , 設詐 飾 如 詭 仓 獄 以 以 而 禮 肆 不

也

摧

撓

之則衰痿。今教童子,

必使其趨向鼓舞,中心喜悅,

則

其進自

不能已

其 .頑鄙;偷薄庸劣,日趨下流。是蓋驅之於惡,而求其為善也,何可得乎?

故特叮嚀以告。爾諸教讀,其務體吾意,永以為訓,毋輒因時俗之言,改 凡吾 一所以教 ,其意實在於此,恐時俗不察,視以為迂;且吾 亦 將 去

#### 清文

廢其繩墨,庶成蒙以養正之功矣。念之!念之!

### 左忠毅公逸事 方苞

叩之寺僧 微行入古寺。廡下一生伏案臥,文方成草。公閱畢,即解貂覆生,為掩戶。 ,則史公可法也。及試,吏呼名至史公,公瞿然注視 , 呈卷

先君子嘗言,鄉先輩左忠毅公視學京畿,一日,風雪嚴寒,從數騎出

[署第一。召入,使拜夫人,曰:「吾諸兒碌碌,他日繼吾志事,惟此生耳。」

面

及左公下廠獄,史朝夕獄門外。逆閹防伺甚嚴,雖家僕不得近。久之,一二五

倚牆 公辨其聲 史 更 而 敝 坐,面額焦爛不可辨,左膝以下筋骨盡脫矣。史前跪抱公膝而 衣 , 而 ,草屨背筐,手長鑱,為除不潔者。引入,微指左公處 目 不可開,乃奮臂以指 撥皆,目光 如炬 ,怒曰:「庸奴 則席地 ! 此 嗚咽。 何

聞

左公被炮烙

,旦夕且死,持五十金,涕

泣謀于禁卒,卒感焉

0

日

, 使

下事 械 地 ,作投擊勢。史噤不敢發聲,趨而出。後常流涕述其事以語人,曰: 「吾 也 誰 , 可支拄者?不速去,無俟 而 汝來前 !國家之事糜爛 奸 至此 人構陷,吾今即 ,老夫已矣 , 撲 汝 殺 復輕身 汝! 而 昧大義 因 摸 地 , 天 上刑

崇禎末,流賊張獻忠出沒蕲、黃、潛、桐間,史公以鳳廬道奉檄守御。

師

肺

莊

,皆鐵

石所鑄造也。」

鏗 每 人 蹲 然 有警, 有聲 踞 而 背倚之 輒 或 數 勸 月不 以少休,公曰:「吾上恐負朝廷,下恐愧吾師也。」 , 漏 就 寢 鼓 移則番代 ,使將士更休 0 每寒夜起立, , 而 自坐幄幕外。 振 衣裳 擇健卒十人,令二 ,甲上冰霜迸落

史公治兵,往來桐城 ,必躬造左公第 ,候太公、太母起居,拜夫人于

余宗老涂山,左公甥也,與先君子善,謂獄中語乃親得之於史公云。

### 原君 黃宗羲

堂上。

量而 千萬 而 害 己之害為害,而 不得去者,禹是也。豈古之人有所異哉?好逸惡勞,亦猶夫人之情也 而 不 莫或 倍之勤勞,而 有生之初,人各自私也,人各自利也;天下有公利而莫或興之,有公 欲 入者 除之 0 ,許由、 使天下釋其害。此其人之勤勞,必千萬於天下之人。夫以 有人者出,不 己又不享其利,必非天下之人情所欲居也。故古之人君 務光是也。 以一己 入而又去之者,堯、舜是也。 之利為 利 , 而 使天下受其 利 初不欲入 不 以

後之為人君者不然!以為天下利害之權皆出于我;我以天下之利盡歸 二七

傳之子孫,受享無窮。漢高帝所謂「某業所就,孰與仲多」者,其逐利之 以我之大 於己,以天下之害盡歸於人,亦無不可。使天下之人不敢自私,不敢自利;一二八 私,為天下之公,始而慚焉,久而安焉。視天下為莫大之產業,

情,不覺溢之於辭矣!

其未得之也,屠毒天下之肝腦,離散天下之子女,以博我一人之產業 不慘然!曰:「我固為子孫創業也!」其既得之也,敲剝天下之骨髓,離散 也;今也以君 此無他,古者以天下為主,君為客,凡君之所畢世而經營者,為天下 為主,天下為客,凡天下之無地而得安寧者,為君也。是以 曾

然 天下之子女,以奉我一人之淫樂,視為當然。曰:「此我產業之花息也!」 則 。嗚呼!豈設君之道,固如是乎! 為天下之大害者,君而已矣!向使無君,人各得自私也,人各得自利

子之言,聖人之言也。後世之君,欲以如父如天之空名,禁人之窺伺者, 焉,以為君臣之義無所逃於天地之間,至桀 紂之暴,猶謂湯 天 而 妄 地之大,於 下之人,怨惡其君,視之如寇讎,名之為獨夫,固其所也。而小儒規規 傳伯 古者天下之人,愛戴其君,比之如父,擬之如天,誠不為過也;今也 夷 ` 兆人萬姓之中 叔齊無稽 "之事; · , 獨 視兆人萬姓崩潰之血 私其一人一姓乎!是故 肉, 武王,聖人也;孟 曾不異夫腐 武不當誅之, 鼠 ! 豈

矣!昔人願「世世無生帝王家」;而毅宗之語公主,亦曰:「若何為生我家!」 不 既 能 以 勝 產業視之,人之欲得產業,誰不如我?攝緘騰,固烏鐍 天下欲得之者之眾;遠者數世,近者及身 ,其血肉之崩潰在其子孫 , 一人之智力

二九

皆

雖

然,使後之為君者,果能保此產業,傳之無窮,亦無怪乎其私之也;

不便於其言,至廢孟子而不立,非導源於小儒乎?

痛哉斯言!回思創業時,其欲得天下之心,有不廢然摧沮者乎!

不明乎為君之職分,則市井之間,人人可欲;許由、務光所以曠後世而不 是故 明乎為君之職分,則唐 虞之世,人人能讓;許由、務光非絕塵也。

聞也。然君之職分難明。以俄頃淫樂,不易無窮之悲,雖愚者亦明之矣

# 與友人論學書 顧炎武

為學者,往往言心言性,而茫乎不得其解也。 比 往 來 不南北 ,頗承友朋推一日之長 ,問道於盲。竊嘆夫百餘年以來之

著之易傳,未嘗數以語人。其答問士也,則曰:「行己有恥。」;其為學, 則曰:「好古敏求。」;其與門弟子言,舉堯 舜相傳所謂「危微精一」之說, 命與仁,夫子之所罕言也;性與天道,子貢之所未得聞也。性命之理

切不道,而但曰:「允執其中,四海困窮,天祿永終」。嗚呼!聖人之所

篤實無若子夏,而其言仁也,則曰:「博學而篤志,切問而近思。」 猶 以為學者,何其平易而可循也!故曰:「下學而上達。」顏子之幾乎聖也, 曰:「博我以文。」其告哀公也,明善之功,先之以博學。自曾子而下,

而一 皆與之言心言性。舍多學而識,以求一貫之方;置四海 之困窮不言,

今之君子則不然,聚賓客門人之學者十百人,「譬諸草木,區以別矣。」

桃東魯而直接二帝之心傳者也。我弗敢知也。 而 終日講危微 精 一之說 。是必其道之高於夫子、而其門弟子之賢於子貢

臻 、周霄、彭更之所問,與孟子之所答者,常在乎出處、去就、辭受、取

《孟子》一書,言心言性,亦諄諄矣,乃至萬章、公孫丑、陳代

、陳

與之間。以 伊尹之元聖,堯、舜其君其民之盛德大功,而其本乃在乎千駟

介之不視不取。伯夷、伊尹之不同於孔子也,而其同者,則以「行一不

言,而今之君子之所恒言也;出處、去就、辭受、取與之辨,孔子、孟子 之所恒言,而今之君子所罕言也。謂忠與清之未至于仁 ·,殺一不辜,而得天下,不為。」是故性也、命也、天也,夫子之所罕 言仁者,未之有也;謂不忮不求之不足以盡道,而不知終身於 ,而不 知不忠與清 | | | | | |

義

身以至於天下國家,皆學之事也;自子臣弟友以至出入、往來、 愚 所 謂聖人之道者如之何?曰:「博學於文。」曰:「行己有 恥 辭受 自

求

而可以言道者,未之有也。我弗敢知也。

而

可以

取 之不被其澤 與 無本之人,而講空虚之學,吾見其日從事于聖人而去之彌遠也。雖然 嗚呼:士而不先言恥,則為無本之人;非好古而多聞, 之間,皆有恥之事也。恥之於人大矣,不恥惡衣惡食,而恥匹夫匹婦 , 故曰:「萬物皆備于我矣,反身而誠。」 則為空虛之學。

以

非愚之所敢言也,且以區區之見,私諸同志,而求起予。

## 師心自用 劉開

如是,則終身幾無可問之事。賢於己者,忌之而不願問焉;不如己者,輕 是己而非人,俗之同病。學有未達,強以為知;理有未安,妄以臆度;

之而不屑問焉;等於己者,狎之而不甘問焉;如是,則天下幾無可問之人。

人不足服矣,事無可疑矣,此惟師心自用耳。

下人;此為害於心術者大,而蹈之者常十之八九。 (問說) 夫自用,其小者也;自知其陋而謹護其失,寧使學終不進,不欲虚以

# 為學一首示子姪 彭端淑

為學有難易乎?學之,則難者亦易矣;不學,則易者亦難矣 天下事有難易乎?為之, 則難者亦易矣;不為,則易者亦難矣。人之

焉;迄乎成,而亦不知其昏與庸也。吾資之聰,倍人也;吾材之敏,倍人 也。屏棄而不用,其昏與庸無以異也。聖人之道,卒於魯也傳之。然則昏、

吾資之昏,不逮人也;吾材之庸,不逮人也。旦旦而學之,久而不怠一三四

庸、聰、敏之用

, 豈有常哉?

年來欲買舟而下,猶未能也。子何恃而往?」越明年,貧者自南海還 告富者 而貧者至焉。人之立志,顧不如蜀鄙之僧哉? 如?」富者曰:「子何恃而往?」曰:「吾一瓶一缽足矣。」富者曰:「吾數 蜀之鄙有二僧,其一貧,其一富。貧者語於富者曰:「吾欲之南海,何 ,富者有慚色。西蜀之去南海,不知幾千里也;僧之富者不能至, , 以

是故聰與敏,可恃而不可恃也;自恃其聰與敏而不學者,自敗者也。

昏與庸,可限而不可限也;不自限其昏與庸而力學不倦者,自力者也。

### 勤訓 李文炤

徒然食息於 日 食褕衣,玩日 流水不腐, 而 生之計在於勤。」言雖近而旨則遠矣。無如人之常情,惡勞而好逸,甘 效功;以之為商,則不能乘時而趨利;以之為士,則不能篤志而 治 生之道,莫尚乎勤,故邵子云:「一日之計在於晨,一歲之計在於春, 誠不欲其常安也。人之心與力,何獨不然?勞則思,逸則淫 天地之間,是一蠹耳。夫天地之化,日新 **閻歲。以之為農,則不能深耕而易耨;以之為工,則不能計** 則 不敝 0 故 戶樞 不蠹 力行;

### 者乎?

物之情也。大禹之聖,且惜寸陰,陶侃之賢,且惜分陰,又況賢聖不若彼

## 病梅館記 龔自珍

江寧之龍蟠,蘇州之鄧尉,杭州之西谿,皆產梅。或曰:梅以曲為美

三 五.

價, 畫士 者 斫 又 非 直 , 蠢 而江、浙 斫 、刪 ,心知其意,未可明詔大號,以繩天下之梅也;又不可以使天下之民, 蠢求 其 密、 正 ,養其旁條;刪 錢 之梅皆病。文人畫士之禍之烈至此哉! 之民 鋤 正, , 以 能 以其智力為也 殀 梅 其密, 、病梅為業以求錢也。 夭其 。有 稚枝 以 (; 鋤 文人畫士 其直 梅 , 孤 癖 遏其生氣 之隱 、之疏 , 明告 、之曲 , 以 求 灣梅 重

直

則無姿;

以報為美,正則無景;梅以疏為美,

密則無態。

固也。此文人

之 , 毀其盆,悉埋於地,解其椶縛, 予 購三百盆 , 皆 病 者,無一完者 以五年為期,必復之全之。予本非文 0 既泣之三 日, 乃誓 療 之。 縱 之 順

人畫士 ,甘受詬厲 0 闢 病 梅 之館以貯 之

烏乎!安得使予多暇日,又多閒田,以廣貯江寧、杭州、蘇州之病梅,

窮予生之光陰以療梅也哉?

#### 原十二的

乎風。」 戰皆是也。有一二賢且智者,則眾人君之而受命焉;尤智者,<br/> 赴利。眾人所趨,勢之所歸,雖有大力,莫之敢逆。故曰:「撓萬物者莫疾 此一二人者之心嚮義,則眾人與之赴義;一二人者之心嚮利,則眾人與之 風 俗之厚薄奚自乎?自乎一二人之心所嚮而已。民之生,庸弱者 風俗之于人之心,始乎微,而終乎不可禦者也。 所君尤眾焉。

者,其徒黨亦死功利而不返。「水流溼,火就燥。」無感不讎,所從來久矣 而 而 世 播為聲氣 教既衰,所謂一二人者,不盡在位,彼其心之所嚮,勢不 一時之人才出焉。有以仁義倡者,其徒黨亦死仁義而不顧;有以 先王之治天下,使賢者皆當路在勢,其風民也皆以義,故道一而俗同 。而眾人者,勢不能不聽命,而蒸為習尚。于是乎徒黨蔚起, 能不騰為 功利倡 口 說

之所嚮,轉移習俗,而陶鑄一世之人;而翻謝曰:「無才。」謂之不誣 今之君子之在勢者,輒曰:「天下無才。」彼自尸於高明之地,不克以一三八

習俗而陶鑄一世之人,非特處高明之地者然也;凡一命以上,皆與有責焉 尤者而材之。 可乎?否也!十室之邑,有好義之士,其智足以移十人者,必能拔十人之 其智足以 移百人者,必能拔百人中之尤者而材之。 然 則 轉移

為之,數十年之後,萬有一收其效者乎!非所逆睹已。 存 之,則 有 國家者,得吾說而存之,則將慎擇與共天位之人;士大夫得吾說而 將惴惴乎謹其心之所嚮,恐一不當,而壞風俗,而賊人才。循是

者也。

### 附錄

# 德育故事緒餘

孝篇【緒餘】

以顯 君。身體髮膚。受之父母。不敢毀傷。孝之始也。立身行道。揚名於後世。 其哀。祭 孝經云。孝子之事親也。居則致其敬。養則致其樂。病則致其憂。喪則致 中孝用勞 父母。孝之終也。夫孝、始於事親。中於事君。終於立身。小孝用力。 夫孝、德之本也。說文、孝、善事父母者。从老省、从子、子承老也。 川致 。大孝不匱。試觀烏鳥反哺。羔羊跪乳。禽獸尚知孝。可以人而 其嚴 。五者備矣。 然後能事親。君子之事親孝 。故忠可移於

## 孝篇【緒餘】

反不如乎

父 莫 大 孔 子 於 配 曰。天地之性、人為貴。人之行、莫大於孝。孝莫大於嚴父。嚴 天 0 故 大孝尊親 。其次不辱 0 其下能養 0 五孝惟 庶 人 始 言養

蓋 冰 敢 口 忘 犬 父母 忿言不反於身。不辱其身。不羞其親。戰戰兢兢。 馬皆能有養。不敬何以 以 保令名 0 道 0 而 斯 不徑 可 以 0 調孝 舟 而 。而 別乎。必也一舉足而不敢忘父母 不 游 悌忠信禮義 0 不敢 以先父母之遺體行殆 廉 恥 0 皆在其中矣 如臨 · -深 0 惡言 0 淵 易言 出言而不 不 如 履薄 出 之 於

則 不悌不忠不信。無禮無義無廉無恥。皆為不孝爾

## 孝篇【緒餘】

宗矣 根 本已失 孝者 。而 女子之孝 。有身 所 以事 如無身矣。父母之身。祖宗之分身也。孝父母、 。則尤有進。在家則孝其父母。出嫁須孝其舅姑。蓋 親也。人子之身。父母之分身也。不孝父母 即孝其 則 此 身之 以 袓

節 抑 夫 孝為 思舅姑 者 。舅 主 之育夫。猶 。萬善百行。惟孝為尊。故八德以孝先焉 姑之分身也。人每愛其夫 之父 母之育己也。夫 。 而 以 婦一 舅姑謂無生身之恩。 體 。而 。其各勉之。 謂可忽乎哉 恝然 。女子以 置 之。

## 孝篇【緒餘】

奮 無 其 係 以 毛 至 後 不 裏 性 顧 皆當挺身擔任之。惟情有難易之不同 女子 0 之屬 身 有 之孝。不僅溫清定省而已。 不為 夫 0 。未蒙撫育之恩。無非敬夫所尊。愛夫所親已耳 以 與 私念所奪。若 子 急父母 以牽其 ·之事。 情 0 乃良. 非 此 有毅 時對 知 良能 力者。 於 父母 凡各 之發現 曷克 。如未嫁時。倚父母 0 項事務。 亦奮身急事 。猶 至 此 親親 與父母舅姑 0 至子婦 之本心 0 \_ 如 0 對 也。 乃 未 以 。有 於 舅 能 生存 嫁 推孝父 時 迨 姑 切 實 既 0 則 似 則 嫁 關

母

之

·心

以孝之

。修

人補

天。尤

恒情所難

。而

至孝之人

0

則無所

謂

難

者

由

其深明夫婦一體之義爾

## 悌篇【緒餘】

之不悌 有後 故 長 如 順 為 螺 先 可移 弟 夫弟 旋 次弟也 0 增作悌 夫 於 而 、德之序也。 徐 長 次弟 行者 0 0 上長 引申 之義 。 示 0 豈 人以心中不忘先後次弟 長 之為兄弟之弟。為豈弟 生 人所不能哉 而 馬 如韋束之次弟也。革縷束物謂 民 0 興悌 故 說 0 文 徐 象形 0 所不為也。堯舜 行 ` 0 後 輈 小、須順 長者謂 之弟 五 束 0 0 之 而 弟 衡 之道 三東 之章。 悌 遜 有 0 也 順 。孝悌而已矣 遜義 疾 0 0 君 束 展 行 轉環繞 ` 子 0 之 先 事 故 不 長 善 已 兄 者謂 悌 事 則 兄 勢

## 悌篇【緒餘】

禮 順 0 孔 莫善於悌 子 日 0 弟子 0 教 、 入 以孝 則孝 0 所 0 出 以 敬 則弟 天下之為人父者也。 0 又 日 ` 教民親愛 教 。莫善於孝 以悌 0 所 以 教 敬 天 民

下之為 調善 之外 官言之。 固 無 於事兄 即 論 在 己 人兄者也。 故有子 於 0 。出外 弟。故責原壤以 推 之德行 日 則謂善於事長。舉凡年長 敬其父、則子悅。敬 其為人也孝弟。而好犯上者鮮矣 長 於 我 幼 0 學問長於我 而 不遜弟。長而無述焉。是悌 其 0 兄、則弟悅。 於我。分長於我。 皆長 也也 0 悌 夫子 道實包括 也者。在家 職長 之教弟子。孝 師 於 傅及 我 者 長 則

#### 悌篇 緒 餘

0

弟 事 庶 也 之子若 姊 之 0 女子 妹 悌 者 而 女。 皆為長親 之悌 友愛若弟若 0 所 皆無不包括於悌道之中 以事 。當更 長也 0 即 有 妹 妯 進 0 0 無論 。蓋 娌 以 之間。 及 于歸 兄弟 伯 叔 姑嫂 姑姊 以後 之子 0 之間 兄嫂師 所謂愛屋及鳥 女 0 以 0 姊 。嫡 夫家 妹 友 庶之間 為家 之子 。 凡 女。 0 0 長於我者。 0 無論 懷 皆 其少 以 及 在 舅 妯 姑 於 ` 二 即 悌 皆 娌 所 應敬 人 姑 道 嫂嫡 之兄 以 之 中 敬 以

其長也。孝悌為人之本。本立而道生。可不慎 歟。

## 悌篇【緒餘】

欲其志 宜 姊 故 以 兄弟姊妹。氣 慈 異 妹 姒 (姓而) 仁 非緩急 以寬 女子之悌。行於兄弟姊妹之間者易。行於妯娌姑嫂嫡庶之間者難。蓋 同 道合 處人之骨肉 則 和 之賴 0 姑 戏娱無不 娣 分 。不亦難乎。是故夫道嚴正。嫡道寬慈。妾道柔順。三善合、 一體。情 以恭 。每易恃 . 協 順 0 同時為兄弟之斧斤。最易構釁起爭。 矣 0 性 則 目前 0 相 推 妯 關 而 之城 **娌無不合矣。其姑嫂、則父母無終身之** 。親愛出於 言之。 社 0 嫡 傷 庶 日 天然 後之松蘿 非同胞之親 0 休 戚自易 。是故 0 無皇英 相 化 姑 顧 同 宜愛敬 0 之懿 為 至 異 妯 依 。是 娌 而 嫂

### 忠篇【緒餘】

而

太

和在閨門之內矣

夫忠、德之正也。唯正己可以化人。惟正心所以修身。故格物 致知。

當 中聲 自求諸心。欲正其心者。先誠其意。誠 。注 日 0 敬者 、肅也。未有盡心而不敬者。箋 則敬。說 日。 文。忠、敬 盡己之謂忠。 也。 从 故忠 ら い

掩 瑜 。瑜不掩瑕。忠也。傳曰。小大之獄。 雖 不能察。必以情。忠之屬也。

有誠

義

。論

語

日

。為人

謀而不忠乎。

記日。

喪禮

、忠之至也。又

日

0

瑕不

孟子曰。教人以善。謂之忠。觀於此數者。可以知忠之義。所謂反身而誠

然後能忠是也

## 忠篇【緒餘】

王 心之謂也。中不合道。則理有倚偏。道不中心。則道有未盡 曾原忠篇云。忠之義大矣。忠之理微矣。忠者、中心也。中於道而合乎 孔子曰。忠焉能勿誨乎。又曰。忠告而善道之。此皆教人以善之義也。 0 故 不偏不倚

— 四 五

族 光 之謂中。中道中 日 0 化 月 鄉 壯 鄰 山河。固社稷。衛生民 0 厚風 心。忠名乃定。忠之義則無所不包。大而格天地 俗 。且不特為人宜忠。 。小則敦孝悌。和夫婦。信 而 自為亦當忠。忠恕違道不遠 朋 。感鬼神 友。 睦 宗

四六

## 忠篇【緒餘】

施諸

己而

不

願

。 亦

勿施於人

。夫子之道。忠恕而已矣

忠於 不盡 事之 友。 忠者 ら い 便是 皆忠也。食人一 謀 。所以盡心也。非專指忠君言也。凡忠於天。忠於國。忠於主 0 虧 故 Ü 孔 門一貫 0 虧 Ü 便是 日之禄。必忠人一 Ü 法 欺 。忠先乎恕。曾子三省其身 い い 0 欺 Ü 便是 日之事。受人一事 欺天 0 天 可 欺 0 首 乎。 及 之 而 於 託 女子 忠 0 必 0 忠 之

忠

以

夫為

的

0

故

日

。夫者、天也

。 天

不

可欺。夫自

不可欺

也

知

忠於

夫

則對

於舅姑

0

對

於家庭

0

對於教育子女。無時不隨分隨事

0

而

各盡其

心矣。

## 忠篇【緒餘】

虎 敵 歃 窛 保英妻之守平州。古玄應妻之守飛狐。皆以家僮女伴。 狡焉思啟者。方耽耽雄視。以待天擇。若不得繡旂錦 帳 愾 血 勤王 史思明 健 0 女子之忠 其事 兒 0 0 安知 之叛 ,誠未可責之女子。 赴營討賊 0 也。 無 對 於國 甘 徫 Ü 。百世之下。 巾 州女子侯氏 家能盡其心者 幗 者 但當此過渡時代。 0 而囊括全宇。將待何時。天下興亡。人人 猶能使人壯氣指冠。 。滑州 0 不可 女子 勝數 唐氏 。如 強 弱 。青州 甲。 兩 李侃妻之守 厲氣狗城 馳 派 雖 擐甲 女子 突槍風 0 勢 挺 王 不 氏 並 戈 陳 彈 卒 州 立 雨 為 卻 相 間 彼 國 與 強 鄒

有責

。盡心女子

。盍興乎來

### 信篇 緒

無 信 貊 信 之 0 信 而 也 之 上好 心意 不 後 夫信 0 立。 言 諫 信 、德 必 0 0 有 人 未 信 0 而 信 ` 信 之固 則民莫 無信 則民 0 ` 則 也。 可 。不知其可也。大車無輗。 任焉 敢不用情。 以 以 為謗己也。 踐 說 文。 交 0 故君子信 遊 誠也。 之然諾 可 古帝王之治 以去兵。 从 而 0 後勞其民 可 人 从言。會意。是知 以 可以去食。而 化 天下 倫 小車無軏 .'。未信 類 之猜 0 上信 ` 嫌 不可 下行 則 其 何 0 人言 以 可 為 以去信 0 以 以 之不 孚 厲 行 而 之哉 人 己 州 民崇 ·可不 也 0 里 民 鑾

#### 信篇 緒 餘

.

信 必 以 信 不信 孔 子 0 民 而 日。道千 君 弗 民之間 從 0 乘 下焉 亦 之 者雖 必 國 以信 0 敬 善不尊 事 。豈父子夫婦昆弟朋友 ,而信 0 不尊 0 中 不信 庸 云 。上 0 不 信民 馬者雖善無徵 之間 弗從 0 而 是 可 君 。無 不信乎 臣 之間 徴不

若 之後 信 歐 調信專屬 陽 必 修 0 由 而貫八德之中。君臣父子夫婦昆弟朋友。 衷 日 0 0 當讀周鄭 自信 朋 友 0 始可以信人。吾人持身涉世。全賴信為維持 猶 不足以盡信之量也 交質篇 0 信不由衷。 質無益也。不禁反覆思之。 非信 無以 成其德而 。蓋信居五常 篤其倫 竊 謂

#### 信篇 【緒 餘

豈 德 倫 倫常最重 僅 也 ` 在然諾 信 信者。所 屬 ら い 口 朋 0 如一 五 盟誓間乎。女子之信 友 以 立 常 坤 0 0 而 • 世也。一片真誠。無一可假。無一可偽。人參三才而立。 至柔 言行 君 信居其末。 臣 而 父子夫婦兄 相 動 顧 也剛 0 而 歷 始 仁義禮 0 終 至靜 弟 尤 以守貞為主 而 0 實皆 弗貳 而 智。實皆不可假 ·德方。 不可偽 。處常變 貞一不二 。 故 0 大易言坤 而 故 不 信 0 又貫 移 故 信貫五 0 守靡 大 五 之 體 信 倫 他 常 日 不 利永 其 約 。 五 為

貞

文言

日

0

`

0

0

信

則

四九

得矣。

### 信篇 【緒餘】

死節 當困苦顛 或 巵 無奈。固 女子名節在一身。稍 之身。全堅貞之信 死 或守 者 如捧 女子之信 0 然連之際 亦什九也。然皆為婦德。 盈水 無庸強踐舊迹爾 0 亦各全其信耳。碎玉一朝。與茹茶百歲。 0 。不惟從一而永終。抑且剛方而正 0 Ü 金久煉而 。何 不 有微 欲 為 則、男子事業在六合。苟 耳目 玷 0 愈精。滓泥汚穢之中。 。萬善不能掩瑕 所 變 能死者未必不能守。能守者未 0 迹不 欲 為中 0 然居常處順 非嬻倫 外 始。所謂守貞也。 蓮含香而 所 無所軒輊。苔非勢迫 疑 0 0 小節 。 十 然 自 後 女九 潔 猶 可 必 足 以 不 0 則守節 貞 自 成 如 能 持玉 清潔 贖 死

惟

### 禮篇【緒餘】

夫禮 德 之範 也。教人遵上訓下。履行人倫規矩也。 說文。 禮 履 也

定 也 所 以 省 禮 0 以 温 節 祀 不 知 神 凊 之 致 禮 0 0 福 出 亦 0 告反 也。 無 不 可 以 禮 面 行 立 也 0 有 0 禮 五 0 禮 經。 行 上 之 體 於 則 父子 莫重於祭 優 0 敬 賜 矣 有 為 主 0 加 外 。故 0 0 禮 下 內 則 之用 禮字从示从 位 正 鞠 躬 0 0 和 和 盡 .為貴 而 瘁 豐 有 0 别 禮 0 0 豐 行 知 0 • 禮 和 於 行 君 行 而 於 臣 和 禮 夫婦 矣 之器 0 不

#### 禮篇 人緒 餘

日。

禮

0

則

不敬

0

而

無失

。與

人

恭

而

有

禮

五.

行

於

朋

友

矣

矣

0

長

幼

有序

0

伯

友仲

恭。

禮行於兄弟矣。

樂群敬業

0

毋

相

聚

以

邪談

禮

所 倫 常 以定尊卑。 日 孔 用 子 之間 明貴賤 0 上好 無時 0 無地。不 辨等列。序少長 民莫敢 立 於禮 0 非禮無行也。呂東萊曰 。習威儀。人 故君子敬 所不能外其規 0 夫 矩者 禮 也者 也

禮 況 不能 朝 廟 禘獻 表 其敬 0 非 0 禮 禮 不能 之為 昭 用 其誠 0 豈可須臾離乎。人 。冠 婚 心喪祭。 非禮 能 不 以禮 能盡 制 並其情 ら 0 0 則 賓 奸 朋 盜 酬 詐偽 酢 五二

非

而

之

端

必

不

作

0

人

能

以

禮

制

事

0

則

犯

上作

亂

之事

必不

為

0

故

禮

也者

0

持身涉

世 之 要 端 0 亦 即 治 國 平天下 之 大經 大法 也

#### 禮篇 人緒 餘

遄 死 0 禮 禮 者 以 0 誠 所 敬 以節文 為體 0 也。人之所異於禽獸者 以 威 儀 為用 。以 中 正 為 0 則 以禮故也。 0 以 謙 讓 為 人而 主 0 無禮 本 天 。 胡 殺 地 不 0

婦 不 四 失 箴 子人 也 女子 倫 規 0 則 矩 0 以 非 0 順 禮 為 正 勿 0 0 視 在 0 家 非 從 禮 父 勿 聽 0 0 出 0 嫁 非 從 禮 夫 勿 言 0 夫 0 非 0 死 從 禮 子 勿 動 0 謂 0 之三 0 所 謂 從 守 班 程 0

昭 著 女誠 0 徐后 垂內 訓 0 若 昭 著女論 0 王氏 述 女範 0 皆 女子 、之深明 於 禮者

德 婦 言 婦 容 婦 功 謂 之 四 德 禮 記 內 則等篇 敘 論 綦 詳 至 若

也

### 禮篇 【緒餘】

婦容 守身 子 莊 為女子者。尚其以禮為大防哉 不為 累其賢 則盡 尚閑 以 則持身有 女子之禮 禍夫家。羞母族 並 其 禮 禮 四德亡則禮亡。雖奇能異慧。貴位芳姿。不能掩其惡。事人 雅。 0 正 以教兒女。至 婦功尚 家 禮 。謹 以 矣 禮 飭身心。慎修名節。 0 勤 0 在 。 誦 教子以 慎。 家 於 則 相鼠人而無禮。胡不遄死之句。將無地自容矣。 四德。 四德備則禮備 盡其禮 禮 0 方得為巾幗完人。否則悍妒 尤所當知。婦德尚靜正 以事 溫柔卑順。則事人有禮矣。恭肅端 父 。雖才拙性愚。家貧貌陋 母 0 出 嫁 則盡其 。婦言 禮 以 淫 奉 尚簡 僻 舅 姑 以 無所 不能 禮 婉 0

有

0

0

### 義篇【緒餘】

夫義、德之宜也。說文。義、己之威儀也。古者書儀為義。書義為誼

義 。 思義 義 我 也 所 0 之本訓。謂禮容威儀出於己。故从我。董子曰。仁者、人也 謂仁 為亂。小人有勇而無義。 欲 也 見利思義 必及人。義 0 義 ` 亦我 。義然 所欲也。二者不可得兼 必 後取。人不厭其取。君子義以為上。君子有勇 由中斷制也。从羊。與善美同意。孟子 為盜。義、人之正路也。行義以達其道。 。舍生而 取義者也 。是故 日 。義者 0 生 見得 、我 、 亦 而 則 無

## 義篇【緒餘】

無

往

而

不咸

宜矣

是吾憂也 也 。義之於比。呂蒙正曰。五 孔子 。不義而富且貴。於我如浮雲。君子之於天下也。無適也。無莫 日。君子喻於義。見義不為。無勇也。聞義 倫八德。非義莫能成。父子無義 不能徙。不善不 0 則瀆倫之 能 改

事 繩 無 則 至正 偏 離 興。君臣無義。則僭竊之亂作。兄弟無義。則蕭牆之禍起。夫婦無義 無黨 異之端兆。朋友無義。則傾陷之機伏。故義者。至剛至正。有嚴有法。 0 無物 。 義 不可 之所在。懷若春雷。肅若秋 0 無時不然 。義固不止於一二端見也。 霜 。而不可犯。其規 矩至嚴 。 准

### 義篇 【緒餘】

是謂義妾。夫亡守節。撫孤教子。不肥 克盡女道 中 妯 娌 無時 。感 。守貞母室。或為 義者 無地 化鄉鄰。是謂義婦。或居側室。安分守己。敬事大婦。不奪專房。 :。所以處事也。凡人作事。須處處合乎天理。順乎人情。五倫之 。父母弟昆 。不能離一義字。茲姑不論。第就女子之義言之。閨貞自 0 撫 力為維護。是謂義女。出嫁相夫。孝事舅姑 從一而終 私家。克保夫產。是謂義母。 如義婢乳保等。尤 既字 和 守。 睦

夫故

繼 0

。是謂義姑

0 他

## 義篇【緒餘】

者。 直足 乎自然之性。而 朱 可登。浩乎若江 虎狼在後。一若無所聞知。悍然而無所慮。恬然而無所疑。百折不撓之概 顏 非義襲而取之也。行有不慊於心。則餒 無自免之方。白刃豈甘心之地。然而一死之外。更無他圖。則舍生取 以懾鬼神而破金石。皎乎若日星之炳而不可及。巍乎若山嶽之峻而不 女子之義 。當以名分所在。各盡其責。盡其責所當盡。即為盡義。本 出乎相感之情。其志也潔以貞。其行也勤 海之淵 而不可窮。 懔乎若宗廟之嚴而不可瀆。是集義所生 矣。至若命之不穀。時 以 固 刀 與 鋸 願 在 違 前 0

## 廉篇【緒餘】

義

。亦足多矣

其引 故 無 之 之 俗 取 0 邊口廉 中之義 習專以 不外 夫廉 取 乎氣 傷 。因堂廉之石。平正修潔。而又崚角峭利 、德之節 不貪為廉。不貪、特廉之一隅也。謂廉為德之節 廉 0 為廉直 節清高 又 日 也。 0 0 0 聞 為 品 說 伯 文 行 廉 夷 峻 明 0 之風 潔 廉、仄也。从广 0 為廉 0 者。 而 能 無 頑夫廉 利 0 蔽 為 廉 之 0 蓋廉 私 靜 ` 兼聲 0 0 孟子 為 。故 者、 廉 0 恥 日 潔 人有高 仄 ` 0 0 於 '。須 為 謂 可 貪冒 行謂 廉 側 以 如勁節之 平 邊 取 而 之廉 也 不為 總言 可 堂 以

0

### 廉篇 【緒餘】

不可屈耳

節 而 致 不 用 屈 孔 子 猶 為 日。古之矜也廉。是言其持守太嚴 國 不失為廉 [家作棟 也。 樑 0 胡瑗原廉篇云 為 兆 民謀幸福 。夫士子讀書。所學何事 0 急宜廉隅 。雖 有不 自 -圓和 飭 0 之偏 清 操 自 處 勵 本 0 而 欲出 其 以 不 勁

0

五 七

貪為 雖 渴 寶 而 不 學古 飲 盗 泉 聖賢 0 以 之一介 天 地 為 不 以 ジ 與 0 人。 以 萬 民為命 介 不 。決 以 取 諸 不至 人。 失其節操 雖貧 而 不 。 入 受 瓊林玉 賂 金

不 治 0 以 之 安 民 0 而 民 無 不 安

矣

樹

中

而

迷

其性

0

登

仕

圖

版

籍

而

異其

ジ

0

果

能

如

此

立

ジ

0

以

之治

國

0

而

國

無

#### 廉篇 緒 餘

逸 道 能 迫 淫 不 0 尚 拾 或 廉者 0 服 貧 為 遺 衣 飾 賤 0 0 食 所 者 夜 不 所累 。卒流 以 不 能 立志也 閉 移 户 0 0 於 威 利 0 貧困 。人各有志。孰不喜清高而惡汚濁 成 武 欲 乘 太 不 古 能 之 而 風 屈 0 驕奢 致 矣 0 0 有 比 淫泆 女子 志不 德 於 之廉 能 玉 七 自 0 國 不 立 0 敗 劌 尤 耳 家 以 不 0 勤 嗛 果 莫非不廉 儉 0 能 。惟 為 廉 立 志 本 至 或 極 0 0 所 每 處 則 為環境所 致 富 見 貴 貪 可 女 安 不 以

子

能

廉

0

則

可

以

養成其夫若子

之清德

0

家道:

有不從

此

日

隆

乎

0

0

0

## 廉篇【緒餘】

于歸祇盡於人倫。奚須粧飾。其為婦也。不在掌夫家之管鑰。不計享舅姑 蘭姿蕙質。何事鉛華。玉潔冰清。不資錦繡。許字則聽之天命。莫擇富豪 之 田園 女子之廉 。先 人若有所遺。儘歸娣姒。母家或有所贈。盡獻翁姑。井白 。當其承歡膝下。深處閨中。惟父命之是從。 無冶容之為悅 勤 操

生有子女。更須教導於 之不苟。庶幾達則甘受粗糲之養。不願為牲鼎之烹。窮則不取非義之財。 幼 稚 。以為先入之基。一瓜一果之弗貪。一絲一毫

謀

生自

給。

衣食儉約

0

日

用

有餘

0

尤宜嚴閨閩之清操

。杜良人之貪念

既

亦不為非分之事矣。

## 恥篇【緒餘】

夫恥、德之基也。說文。恥、辱也。从心、耳聲。會意。取聞過自愧

五九

蓋 速 故 之義。凡人心 止 人 賦 其惡 性 以 養惡 本善。習而為惡。天能使人性有善而 0 之心 以 慙、則耳熱而赤。是其驗也。乃教人知羞免愧。歸乎 返於善 0 俾起一惡念、則驚 而 性乃不為習所奪 。行一惡事、則恐。 0 故 無惡。不能使人有習而 恥大有功於性 既驚 0 恥 ら い 且 發 恐 不 天良也。 現 為惡 則 0 即 必

## 恥篇【緒餘】

是天良

0

即是明德基本。孟子曰。恥之於人大矣。不恥不若人。

何若人

有。

親 也 之 所 夫 弟不恭其 不 孔 能 子 八 德 任 日 0 而 0 萬 兄 知 以 . 恥近乎勇。王曾曰。知恥者、可以行人之所不能行。任 。 可 恥 不 至冒 字終之。是 恥 之甚也。不忠不信 貢 非 幾 恥 0 居八德之終 為 奸 盗 詐 。無禮無義 偽 。實全八德之道 0 自 取 亡身辱親 。臨財药 0 0 得 如 敗 子不孝於 家 臨 亡 難药 國 者 人

免

不尤恥之又甚乎

。夫士為四民之首

。而

不知恥自愛以愛人

0

惡在其為

士乎 難 為天地 果 之完人 能立心 0 堅貞 而聖域賢關。亦不難 。守身圭璧。暗室不敢欺其心。 λ 也 仰不愧。俯不怍 不

## 恥篇【緒餘】

女之 恥 是無良。古人謂哀莫大於心死。而身死次之。良心若死。身在何益 德 女子之身。潔如白璧。父母遺體。重若黃金。故八德以恥終焉 之於 之不修 可恥 恥 人大矣。又曰。人不可以無恥。女子幽嫺貞靜。其恥德本優於男子 者 者也。推之不孝不悌不忠不信無禮 0 。言之不慎 所 以潔身也。羞惡之心。人皆有之。 。容之不正。功之不勤。以及三從之不得其 無義 既 無廉 有此天良美德 0 則 可 恥 孰甚。 正 無 故 須 皆 恥 日 知 婦 即

## 恥篇【緒餘】

女子之恥。莫大於失節。 而取憐仰食。猶其次焉。故程子有言。 餓 死

一念之差。卒致終身莫贖。不特羞汚一己。玷累一生。抑且辱及舅姑 小。失節事大。女子而不知恥。小之則治容競麗。大之則蕩檢逾閑。每

六 二

即 可 為悌 。於夫主即可為忠為信。而其待人也必以禮。其處事也必 以義 害有

不可勝言者。故女子有恥。則於父母舅姑。即可為孝。

於兄弟。

姊

妹

0

。 其

父母。辱及夫家門戶。辱及母家弟昆。甚至戚族含羞。子孫蒙垢

辱及

事

因

其 接 以物也必 以 廉。德 必修。言必慎。容必正。功必勤。三從必正矣。故

恥

0

足以賅女子之萬行而無遺焉